

KUSÒKA YESÙ MU CYALU

 Tudi tubala Dîyî dyà Mukalenge. Mu Èvànjeeliyò wa Maataàyi, nshapita wa—wa 8, tubangila ku mvensà wa 23, tudi tubala nùnkû ewu:

Nènku pààkabwelàye mu màzuwà, bayiidi bèndè kumulondabò.

...mònaayi, kwàkajuuka cipeepèlè cinène mu mbû, mu mùshindû wà nè màzuwà àkaavwa mabwikila kùdî mavwala, kàdî yêyè ùvwa mulàale tulû.

Ke bayiidi bèndè kulwa kùdiye, nè kumubùishabò, bàmba nè: Mukalenge, tùsùngilèku: tudi tufwà.

Nènku yêyè kubàmbila nè: Nudi nè bwôwà bwà cinyî, Kaa nwênû beena diitabuuja dikesè? Pashùshe kubùkayè, kàdî kutàndisha mpeepèlè nè mbû; nènku mwaba awu cinyàànyà cinène kwenzekaci.

Kàdî bantu kukàcila, bàmba nè: Ewu mmuntu wà mùshindû kaayi, udi mene nè mpeepèlè nè mbû bimùtùmikila's wè!

2 Twînyikàayi mitù yètù mpindyewu bwà disambila.

3 Taatù wetù wa mu Dyulu, tudi nè disànkà dyàbúngì dilòlò edi bwà kumanya nè Munène Udi ufikisha mpeepèlè nè mbû ku diMutùmikila ewu ùdî neetù. Tudi nè kusàkidila mutùdî nè bujaadiki bunène bwà diikala Dyèndè ànu nè mwoyi leelù ewu, nè bamanyè nè Yêyè ngwa Cyendèlèlèlè, nè Yêyè kèna mwà kufwàku nànsha. Yêyè ùdî nè mwoyi bwà kashidi nè kashidi, nè Wátùleejì luse Lwèndè lunène, twètù bàna bàà bantu mu matùkù aa. Tudi cisàmbà cìdî mu lukèngelu, Mukalenge, mu lukèngelu lwà menemene mu mùshindû wà nè muntu mukwàbò nànsha umwe kàyìku mufwànyine kukùmbaja makèngela ètù to pa kuumusha Wèwè. Pa nànkû tudi tukèba dilòlò edi bwà Wèwè kubwela mu didisangisha dyètù edi, nè kuDimanyisha kutùdî, ku ditùfwila luse ku mpèkaatù yètù, kutuntumuna diitabuuja dyètù, Mukalenge, nè kwòndopa mabèèdî ètù nè ntátu. Nènku patwàyà ku mbànzà yètù, dilòlò edi, swàkù bwà twìkalè nè disànkà, twamba bu mùvwà bàvwà bàfùminà ku Èmawùsè abu nè: “Myoyi yètù kayìvwakù yilàkuka kapyà munda mwètù pàvwàYe wàkula neetù mu njila apu anyì?” Bwalu tudi tulòmba nùnkû mu Dîná Dyèndè. Amen.

Nudi mwà kusòmbaayi.

4 Ndi ànu bu Zekàayi; bintu ebi bìdî misangu yònsò bitámbe kwipidika bwànyì. Ndi muswè kwakulakù neenù ànu bwà katanci kakesè cyanàànà mpindyewu kumpàlà kwà twètù kusambidila babèèdî. Ndi nnwèla twasàkidila bwà

dyelangana dyènù dyà mu dibòko dilenga, nè biikàle nwitabuuja Nyumà, makeèlèlè dilòòlò awu, patùvwà twakula apu, biikàle batwishùibwe nè necìikalè dipòngoloka dinène dyà mabènesha Èndè.

⁵ Ikàlaayi misangu yònsò ànu bavùlùke citùdi balwilè kaaba aka, mbwà kuteeta kubàndisha diitabuuja dyènù mu Bwikadi Bwèndè, bwà wamòna mwà kupeta cyùdi ulòmba aci. Dìbà adi, ku diitabuuja, udi witabuuja.

⁶ Mpindyewu, vùlukaayi nè, dibènesha kanà dyònsò dyà bupikudi ndimana kufucila musinga. Musinga mmufucùibwe, kùdi mùshindù ànu wùmwèpelè wùdiku mwà kukùmbana bwà kucipeta, ngwà kuciitabuuja nè kuciitaba. “Yèyè m’Mwakwidi Munène wa ditonda dyètù.” Mwena Ebèlù ùdi wàmba mwaba awu, mukàndà mumfùndila beena Ebèlù awu, wàmba nè: “Yèyè m’Mwakwidi Munène wa dijìkula dyètù.” Kujìkula, nè kwamba patòòke, ncintu cìmwècìmwè aci, mu bushùwà bwà bwalu. Pa nànkù tudi . . . Yèyè m’Mwakwidi Munène wa ditonda dyètù, ki bwà cinyi Yèyè kèna mwà kutwènzela cintu nànsha cìmwè to ànu patùdi tujìkula patòòke nè Yèyè mmucyènzè. Nènku dìbà adi patùdi tucijìkula patòòke, dìbà adi Yèyè ùdi Mwakwidi Munène, mutwàngaji, bwà kukwàta mudimu pa cyòci aci nè kucikùmbaja. Pa nànkù tudi tulòmba, beeyèmene Nzambi dilòòlò edi, mu musàngèelu Wèndè nè luse, bwà Yèyè kutùpèeshakù búngì buvùlè bwà ngàsà Wèndè, dilòòlò edi. Nènku mpindyewu, vùlukaayi nè, nudi nè cyà kuciitaba.

⁷ Mpindyewu netwikalè mwà kusambidila babèèdi kumpàlà kwà twètù kuumuka, kubàtentekela byanza, kàdi ndi njinga bwà nwikalakù nè diitabuuja dikùmbàne dyà kanùyì nukèngela kwikala ne byà nànkù to. Mwà kujinga bwà nwìkallakù mwà kwolola ànu cyanza cyanààna kwamba nè: “Mukalenge Yesù, ndi muKwitàbùùje. Ndi—ndi . . .” Yèyè ùdi witabuuja Dîyì.

⁸ Mpindyewu, nwamònu’s, Nzambi mmushilàngàne neetù. Bu—bu twètù mwà kwamba cintu kampàndà bwà nwènù kwenza, kàdi nwènù kanùyì nuciitabùùja to, èè, tudi bafwànyine kwamba nè: “Bàlekèlaayi. Kì mbenzèjìibwa bwà kuciitabuuja to.” Kàdi aci kì n’Nzambi Taatù wetù to. Yèyè neènzè cintu kampàndà cikwàbò dìbà dyònsò bwà kukufikisha ku diitabuuja. Ùdi ùteeta kushààla mukwàte ku Dîyì Dyèndè, nè Yèyè neàshaalè mukwàte ku Dîyì Dyèndè.

⁹ Mpindyewu cìdìYe wènzela bintu bìdìYe munkaci mwà kwenza mpindyewu ebi, mbwalu Yèyè mmulayè bwà kubyenza. Kì nnè Ùdi nè cyà kubyenza to; kàdi Yèyè wàkalaya bwà kubyenza, nè aci ki dyeyemena dyètù dyà nè Yèyè ùtu misangu yònsò ànu ùshààla mukwàte ku mulayi Wèndè.

¹⁰ Mpindyewu yònsò wa kunùdi, paùdi nè babèèdi, bananga bèèbè, nè bikwàbò, basòmbe, bóbò kabàyi mwà . . . bu mùdi mwàna wa bakàji mutekète ewu, mmutàmbe kwikala mwàna

mutekète, pèndè mwikale mu ngiikàdìlù udiyè ùsanganyibwa ewu; ànu paùdì witabuuja apu, tentèkèlè mwànà awu byanza byèbè pàcìdì disangisha munkaci mwà kutùngunuka apa. Bakwàbò, bàdì nè bananga bààbò, mu mwoyi wènù nudi nubèelela meeji; ku diitabuuja bàbàndishaayi buludi kumpalà kwà Nzambi, mu disambila. Mpindyewu, nènku, ki bwà cinyi, dîbà adi itàbùùjaayi. Pàdì cintu kampàndà cyènzeka, wèwè. . .

¹¹ Kwèna mwà kudifikisha wèwè mwinè ku diitabuuja to. Wèwè, ncintu kampàndà, ngiikàdìlù kampàndà udi munda mwèbè. “Diitabuuja ncintu cyà dilenga nè byanza,” kî ng’ànù didifwànyikijila to. “Ncintu cyà bàlenga bintu bitèkemenà, cileeki cyà bintu byùdì witabuuja, kàdì kùyì umòna to.” Nè byònsò, byà mvità byònsò byà beena Kilistò abi mpindyewu, vùlukaàyi nè, nku diitabuuja. Byònsò bitàmbe-mfùkilu, dinanga, disànka, ditalala, mwoyi mule, bwimpè, bupòle, lutùùlù, byònsò abi mbintu bidì kabiyi bimwènèka. Ke byà mvità byònsò byà beena Kilistò abi. Mwena Kilistò ùtu misangu yònsò ànu ùtàngila bintu bìdiye kàyi umòna to, bwalu yèyè ùdi ùtàngila ku mulayi.

¹² Mwab’ewu musangu kampàndà, kukàadi bidimu byàbùngì, ngàkabiikidibwa mu cyalu, musangu kampàndà, mu lùpitaadi, bwà kusambidila mwànà wa balume uvwa upunga nè lufù, nè disaamà dyà cilundu. Nkàadi mutèele bwalu ebu misangu yàbùngì, bwalu mbwalu bwà dikèma be bwànyì mèmè. Taatù awu ùkaavwa muntu mukùlumpe, nè maamù. Kàdi nsongaàlùmè ewu ùvwa nè bidimu bitwè ku dikùmi nè binaayi, ngèela meeji, nè yèyè ùvwa ànu mwanàabò umwèpelè mulela. Nènku ùvwa upunga nè lufù, nè disaamà dyà cilundu, kàdì cintu kampàndà kwenzekela mwoyi wèndè. Ùvwa mujimije lungènyì kàyi mudimanyè to. Nènku bàvwa ànu. . . Ùvwa ànu, kaa, ànu—ànu lufù apa mwoyi apa; Ngäpù mwoyi cìvwà mweyelu wèndè—wèndè awu; mweyelu wùvwa mupwekèle bikolè.

¹³ Ke taatù mukùlumpè awu kutùngunukayè nè kuya ku masangisha, wènda ùsengeleela, umòna mulongolodi wa ndongamu, nè bantu bònsò. “Lwàkù, ùsambilè! Lwàkù, ùsambilè! Kwàjikì, lwàkù ànu mu lùpitaadi ùsambilè.”

Mulongolodi wa ndongamu kwambayè nè: “Lwà nendè ku disangisha.”

¹⁴ Yèyè nè “Katwèna mwà kumuumusha mu lùpitaadi to. Ùdi upunga nè lufù.” Ke kwambayè nè: “Bu Mwanèètù Branham mwà kulwa ànu cyanàànà, kulòmba Nzambi, Nzambi neàcìfilè.”

Mèmè kudyambidila nè: “Ndiitabuuja kaayi’s wè!”

¹⁵ Mèmè kuya ku lùpitaadi, nè bangàngàbukà kabàvwakù bafwànyìne kungiitabila bwà mèmè kubwela to. Bòbò nè: “To, wèwè’s udi muntu musèlàngàne, udi nè bàna.” Billy Paul ùvwa mwànà dîbà adi. Kwambabò nè: “Kwèna mwà kubwela to,” bòbò nè, “bwalu udi nè mwànà.”

16 Ke mèmè nè: “Mpindyewu, mèmè kumvwa nè ngàngàbukà yêyè mwinè ùvwa mwena Kàtòlikè.” Mèmè nè: “Bu nsacerdòsè mwà kuswa kufila mishìngà yà ndekeelu kùdì mwànà awu, pìikalàye mwena Kàtòlikè, udikù mwà kumwanyishila bwà kubwelayè anyi?”

17 Yêyè nè: “Abi’s mbishiilàngàne. Nsaserdòsè kèna nè bàna to.” Nwamònu anyi? Bòbò nè: “Udi mufwànyine kuya nè kishi aku kùdì mwanèèbè.”

18 Ke mèmè kwamba nè: “Kàdi, tàngilà, mukalenge. Lekèlè ngàngatè bujitu abu. Nèngèlè cyàlà ku dibèji. Nèngàmbule bujitu abu. Mèmè nciyi nè diitabuuja dikùmbàne bwà kubwelamù dibà adi bwà cyòcì aci to, ncyèna nè bwalu bwà kubwelamù to, dyàmbedi.” Mèmè kwamba dibà adi nè: “Kàdi nèngàmbule bujitu abu.” Ke mèmè kwamba nè: “Anji elabi meeji ku bwalu abu mpindyewu, bu nè mwànà wa balùme awu ùvwa mwena Kàtòlikè, nè mwikàle ùpùnga nè lufù; nènkù uvwakù mufwànyine, nànsha byà munyi, kupangisha nsacerdòsè awu bwà kumupèesha mishìngà yà ndekeelu yà èkéleeziyà anyi?”

Yêyè nè: “To, ncyèna mufwànyine kwenza nànkù to.”

19 Mèmè nè: “Ndi nè mushinga bwàbò bòbò ànu mudi naawù nsaserdòsè bwà mwena Kàtòlikè awu amu.”

20 Ke yêyè nè: “Èyo,” kàdi ndekeelu wa byònsò kwitabayè. Kumvwàdikayè bu Ku Klux Klan, wa mùshindù kampàndà, bintàkanyì byònsò ebi pambidi, kàdi—kàdi kumbweja mwaba wùvwa mwànà mutekète wa balùme ewu, ùpùnga nè lufù.

21 Maamù nè taatù kutwàbo binù ku luseke lukwàbò. Ke mèmè kusambila ànu kaadisambila kakesè cyanààna nè: “Mukalenge Yesù, ndi nKweyemena bwà kubiisha mwànà wa balùme ewu, pa ci- . . . nshindameenu wa diitabuuja dyà taatù ewu nè maamù,” nè kutentekela mwànà mukesè awu byanza. Yêyè’s ùkaavwa mujimije lungènyì munda mwà matùkù àsàtù, ipacila ku nànkù, ngèela meeji, nè mwikàle ùpuuyakana ànu kakesè menemene. Ke mèmè kujuuka, kwamba nè: “Amen.” Mèmè kusambila bwà katancì kakesè, nè kujuuka.

22 Ke taatù mukùlumpè awu kuupukilayè maamù awu mu mabòkò èndè, nè kwamba nè: “Elà meeji ku bwalu abu, munanga wanyi, mwanèètù wa balùme ewu mmwondòpiibwe!” Kakùyì cimanyinu cyàcì nànsha cimwè to. Kàdi’s bàvwa ànu kacya bùùpukilangana ewu nè ewu, nè bàsàkidila Mukalenge.

23 Ke mungàngà mukàjì mutekète awu, mwànà mukesè, inàbànzà mutekète, èyowà’s wè, ùvwa pàmwàpa nè bìdimu bitwè ku dikùmi nè mwandamukùlù, anyì makùmi àbìdì. Ùvwa nè cisùmbù cyà baamingàngà nendè, ke yêyè . . . anyi, ùvwa mungàngà mukàjì mulonge mwikàle nè dipòlomè. Ke yêyè nè: “Mukalenge, ndi nè diciinà dyà nè kwèna umvwa to.” Yêyè nè: “Mwànà wa balùme’s nyèwù ùpùnga nè lufù.”

Yêyè nè: “Kaa, to. Mwânà wa balùme awu neikalè nè mwoyi.” Mwàkambà taatù awu.

24 Ke yêyè nè: “Mmunyi munùdì mwà kwenza maalu mùshindù awu, pèènú wenù. . . s’nudi bamanyè nè mwanèènú wa balùme awu ùdì ùpùnga nè lufù, mu difwikakaja dyà mafi dyà bwena didibu banùpèèshe adi?”

Yêyè nè: “Aci kî ndifwikakaja dyà mafi to.” Yêyè. . .

25 Yêyè nè: “Tàngilà.” Mpindyewu ndi mufwànyine. . . Nkufwànyine kwikala ngàngàbukà musòmbè kaaba aka. Ncyèna mumanye bwalu ebu pa bìdì bìtàngila bwanga, nè byamu byà mudimu mu myàkù yà baamingàngà to. Mbamwenze diteeta kampàndà dyà mwoyi, nè mwoyi wèndè wùdì wùtuuta bitekète menemene. Wùdì ànu wùtuuta bitekète ntàntà mule. Ngàngàbuka kwamba. . . Munganga mukàjì kwambulula ngàngàbukà, kwamba nè yêyè. . . “Aci kacya kacitukù cimanyike mu maalu-malonda to, bu mwoyi mwà kutuuta bitekète nànkù awu, bwà kufùululukawù cyàkàbìdì.”

26 Ncyàdyàkupwàkù mwoyi mmwènekèlu wa muntu mununu awu to. Mukwètù mukùlumpe wa mmwènekèlu wa buutaatù awu kujuukayè nè kutèèka cyanza cyèndè pa dikaaya dyà munganga mukàjì mutekète awu. Yêyè nè: “Mwanèètù wa bakàjì,” mwàkambàye, “mòna’s, wèwè udi utàngila ku mboodi wàwa.” Yêyè nè: “Ke cyònsò cyùdì mumanyè, nkutàngila ku cyòci aci. Kàdì,” yêyè nè, “ndi mèmè ntàngila ku mulayi wà kùdì Nzambi.”

27 Nsongààlùmè awu ùdì mpàndànjlà mu Àfrikè mpindyewu, ùdì nè bàna bàsàtù. Nwamònu anyi? Nwamònu anyi? Mbilondèshile ku cyùdì wèwè utàngila, wamònu’s. Yêyè ùvwa wìtabuuja.

28 Mpindyewu, ndiitabuuja òmwèdimwè adi nè: “Bu Wèwè mwà kulwa kutentekela mwanàànyì byanza Byèbè.” “Bu Wèwè mwà kwakula Dîyi, musadidi wanyì. . .” Nwamònu’s, aci’s ncintu cyùdì naaci. Wèwè—wèwè. . .

29 Dìbà adi kacìvwa—kacìvwa kwenza cintu cyà kwisùkwisù to. Mukwètù mukùlumpe awu wàkacìitabuuja. Ùvwa mupyè ku Cintu kampàndà.

30 Mukàjì wàkalenga civwàlù Cyèndè awu. “Bu mèmè ànu mwà kulenga civwàlù Cyèndè!” Ki cyòci aci. Udi nè cyà kupya diitabuuja adi, munda mwà mwoyi wèbè amu. Cìdì ànu bu mùdì wamba. . .

31 Nudi bamanyè’s, nwènù balùme, wèwè mwikàle—wèwè mwikàle mulùme wa mùshindù mujaalàme, kakwènakù mukàjì nànsha umwe pa buloba ùdì munangè bu mukàjèèbè to. Nkufwànyine kwikala bakwàbò bakàjì balenga batàmbe, nkufwànyine kwikala bakàjì bàdì bafwànyine—bafwànyine kwikala bakàjì bàà—bàà—bàà batàmbe kulengela kwisù, nè

bikwàbò, kàdi cintu kampàndà cìdi nè, pawìkalà bulelèlè munangè mukàjèèbè, kùdi cintu kampàndà *muntwamu* cyùdi kùyi umòna mmwenekelu wendè to, udi mumunange, kàdi kùyi—kùyi mumanyè nè mbwà cinyi to, kàdi udi mumunangè; nè, nwènù bakàji, udi wenza byàmwomùmwe kùdi bàyeebè, udi—udi munange. Nè nwènù bansongàakàji kùdi balundà bèènù bàà balùme; balundà balùme kùdi balundà bàà bakàji, wèwè mutwilàngàne nè muntu ùdi mumanyè nè udi munangè awu, kùdi cintu kampàndà *muntwamu* cyùdi mumanyè nè udi mumunangè.

³² Èè, ke cintu cìmwècìmwè cìdì cìtàngila diitabuuja, udi *mumanye* nè nocyènzeke. Kakwèna mundidìmbì nànsha wùmwe, nànsha bantu búngì munyi bafwànyine kwamba bishìilàngàne, wèwè ucìdi ànu witabuuja cintu cìmwècìmwè aci, bwalu ndiitabuuja dishùwashùwàlè, dilelèlè dishùwashùwàlè. Mpindyewu ikàlaayi nè cyôci aci dilòlò edi, patùdi twakula pa cyena-bwalu eci apa.

³³ Ndi mwakùle bikolè be, nè mushààle mu masangisha ntàntà mule bikolè mpindyewu, ncyèna ànu mupetèku mpùngà wa diikisha, diinè to, kwambwila ànu ku Nòelè. Nènku pa muminu mpampàtekù ndambù, ku dishintulula dyà mùdi kuulu, nè dībà, nè bikwàbò.

³⁴ Ndi muswè kwakula neenù dilòlò edi pa cyena bwalu cyà nè: “kubiisha Yesù,” anyi nè: *Kusòka Yesù Mu Cyalu*.

³⁵ Ku dibala dyètù dyà Mifùndu, tudi tusangana nè kùvwa kwenzèke disangisha dinène. Yesù ùvwa wènda ùya eku nè eku, wènda maalu à kukèma manène, wènda misangu yònsò ànu maalu mimpè, nè wènda kàbìdì cìvwà cìsànkisha Nzambì. Yèyè ùvwa misangu yònsò ànu ùsànkisha Nzambì, kàdi kàvwa ùDisànkisha Yèyè mwinè to, mùdi Bible wàmba. Nènku tudi tusangana nè Yèyè wàkaDimanyisha ànu menemene, nè Yèyè ùvwa Nganyì, ku byenzedi Byèndè. Byenzedi Byèndè byàkamanyisha nè Yèyè ùvwa Nganyì.

³⁶ Nè bukolè bwàkapàtuka munda Mwèndè. Ùvwa ùlongesha mu nsùmwinù, ditùkù dijimà, nè bukolè bwàkapàtuka munda Mwèndè. Nè Yèyè ùvwa nè... ùvwa nè cyà kusabuka mbù, kusabuka, kuya dyàmwàmwa, ku luseke lukwàbò alu. Ku diikalangana cìvwàYe aci, Yèyè—Yèyè ùvwa mumanyè nè kùvwa mudimu munène muMwindile kumpàlà aku, ku luseke lukwàbò aku. Nènku Ùvwa mucyòke bikolè be. Bukolè bùvwa bupàtùke munda Mwèndè, ditùkù dijimà adi, bu mùvwà bantu baMulengè ku diitabuuja dyàbò aku, bwà kuMwitabuuja, nè bikwàbò. Nè Yèyè ùvwa nè... .

³⁷ Bukolè bùvwa buMuumùke, nè Yèyè ùvwa mucyòke. Pa nànkù Yèyè kwalukila mu ndekeelu mwà màzuwà nè kudyàdija panshi pa musààmù kampàndà, Mifùndù yidi yitùlondela nànkù,

bwà kwikishakù ndambù pàvwà màzuwà àkòsolola mbù apu, àsabuka Mbù wa Ngalèlè, mpùngà bwà kwikisha ndambù.

³⁸ Bayiidi Bèndè kwambulabò nkapyà yàbò ayi, kàdi kupusa màzuwà, nènku ànu mùtù bantu bàà ku màyi bafwànyine kwenza amu. Bòbò, ke cìvwà mudimu wàbò, bààbúngì bàà kùdìbò abu, wàbò musandu. Bàvwa balòbì bàà mishipa pa mbù apu, nè—nè bàvwa bamanyè mùshindù wà kukòntonona màtù aa. Nènku bàvwa bààlukile ku mudimu wàbò, biikàle ànu bàpicila mu cikondo cyà dicyònkómoka, cikondo cyà cyanga, pàmwàpa bàyiikila bwà maalu àvwa menzeke ditùkù adi awu.

³⁹ Nudi bamanyè's, kùdi cintu kampàndà pa bwalu abu, cìdì nè patùdi tumòna Mukalenge wetù Yesù wènza bintu, nènku biikàle mwà kumanya nè n'Yèyè, nè cintu cikwàbò nànsha cìmwè kacýènàkù mwà kucýènza to pa kuumusha Yèyè, tudi ànu... Patùdi tudisangisha pàmwè, tudi ànu... Muntu yònsò mmuswè kufila bujaadiki. Muntu yònsò mmuswè kwambakù cintu kampàndà, nè mmuswè kwakula bwà bwalu abu. Nudi mwà kwenza ditàbuluja mu èkèleeziyà wenù; mpaasàtà ùdi mwà kwakula mu diyisha dilenga dyà dikèma, anyi mutangadiki, anyi ní nganyì yònsò udi mufwànyine kwikalakù awu; anyi udi mwà kumòna cintu kampàndà cyènzeka, anyi cintu kampàndà ku mutumba aku, muntu kampàndà wàkondopiibwa. Beena mutumba bàdisanga nè bàyiikila bwà bwalu abu. “Mùshindù mwinè wùdìbì bilenga bilayà's wè! Úvwapù anyi? S'bivwa bikèngela wèwè kwikala mudimwèneci. Cìvwa ncintu cyà citàmbe kwikala cyà pabwàcì.” Kùdi cintu kampàndà pa bìdì bitàngila byenzedi byà Nzambì cìdì cìsalula mwoyi wà muntu kutàmba cikwàbò cintu cìdì cyènzeka. Kùdi... Cìdì ànu mmalabula àdi kaàyi kupwa mwoyi patùdi tutwilangana nè Mukalenge Yesù nè tumòna bintu bìdìYe wènza, nènku njila Yèndè mminène nè milenga milaya.

⁴⁰ Mpindyewu tudi tujandula nè bàvwa bàcyònkómoka pa byenzedi bìvwà byenjiibwe mu ditàbuluja dyà ditùkù adi, nènku pàmwàpa ndi mufwànyine kutùfwànyikija, dilòòlò edi, mu mùshindù wùmwèwùmwè awu.

⁴¹ Mpindyewu twáfùmu ku didimwena dimwè dyà ku matàbuluja à matàmbe bunène, ngèèla meeji, dikaadiku bàà pa buloba bamòne, mu bidimu dikùmi, anyi dikùmi nè bitaanu bishààle ebi. Cìvwa ndi—nditabuluja, kabiyi ànu bu matùkù à Billy Sunday to, anyi matùkù à ditàbuluja dyà ba-Gallois to, anyi mu matùkù à—à ditàbuluja dyà Wesley, anyi ditàbuluja dyà Moody, anyi ditàbuluja dyà Billy Sunday, cìvwa bwalu bwà butangàlake buloba bujimà, pa buloba bujimà. Masangisha manène à dyondopa nè tupyà tunène twà ditàbuluja tùdi tùlakuka pabwìpì nè dìnà kakùnà nè kakùnà kònsò kàdiku pa buloba. Ànu dilòòlò edi, lwà mu malaba à Àfriké mwàmwa, mu Chine mwàmwa nè mu Japon, Èvànjeeliyò ewu ùdi munkaci mwà kuyiishiibwa, nè bantu bàdi munkaci mwà kwondopiibwa

ànu mu kasunsa aka mene, mu nyùngulukilu mwònsò nè pa buloba bujimà. Dìvwa ndimwè dyà ku matàbuluja à matàmbe bunène, bwalu, ndi ngèela meeji nè, ndimwè dyà ku matàbuluja à ndekeelu ìkalà buloba ebu mwà kumòna, ditàbuluja dyà ditangalaka buloba bujimà.

⁴² Kàdi mpindyewu, mu ndambù wa bidimu bishààle ebi, ndipuwe. Kanücyèna numòna dizùka mu bantu, mwàkadibi pa ciibidilu amu to.

⁴³ Ndi mvùluka mùmvwà mupete dyèsè, ku Nyumà Mwîmpè, bwà kulombola ditàbuluja dyàkabanga adi, pàakamwènekà Mwanjèlò wa Mukalenge awu ku musulù nè kwamba nàнку, kùkaadi bidimu bitwè ku byàbùngì. Nè pa kucimòna cyènzeka, nè kucimòna citeemesha myoyi yà bambi nè kapyà, myaba yònsò, matàbuluja àbwayika. Mòna's, uvwa ànu mwà kubwela mu nzùbu kampàndà, nè bantu bàjuuka ànu mu tulààlù twàbò twà babèèdi atu nè tulààlù twà kwambwila babèèdi, nè buumuka bàya, bwondòpiibwe. Kabìyi nànsha bìkèngela bwà wèwè kwamba dìyi nànsha dimwè to. Ànu—ànu kwikalamù cyanààna, ke cyònsò cìvwà cìkèngelà aci's.

⁴⁴ Ndi mvùluka dilòòlò kampàndà mu Vandalia, mu Illinois. Mèmè kubwela ànu mu disangisha, nè ncìyi ànu mwanji kwenza tusunsa tupite pa tùtaanu to, nènku kakùvwa muntu nànsha umwe nè butekète mu mwaba awu to, mu mwaba wònsò awu. Màkalù à balèmà masàka pambèlu nè mungwija mòna mushiki. Mpofo yìvwa munkaci mwà kumòna, nè mpudimaci nè tumàmà twàkula, nè—nè cìvwà ànu...Nyumà wa Mukalenge ùvwa mwaba awu, nè Yèyè wàkondopa ànu kasumbù kààbò kajimà aku. Mpindyewu ke dîbà dyùdi mwà kwenza cintu kampàndà, pàdi ditàbuluja munkaci mwà kwenzeka. Kàdi mudilu wà ditàbuluja awu wùjimèbi, dîbà adi mbikolè bwà wèwè. . . Bantu bàcidi ànu beena Kilstò, kàdi kabèèna bafùlùlùdìibwe mu Nyumà awu to, cyuyùya cinènè cidi cyènza cintu kampàndà aci.

⁴⁵ Mbyenze ànu bu mu mubanza kampàndà, mu ditanda dyà nsenda. Bìkèngela wikale nè cyamu cifiike cyela mu kapyà bangabanga nè wèwè kutwàdija kucitucila nsandu pa cyamu cyà bujitu. Wèwè kùyì mwenze nàнку to, kwàdyàkucyòlolakù to.

⁴⁶ Nènku's ke cidi cìkèngelà bwà kwenza ditàbuluja ncyòci aci, mmuntu yònsò mwikàle mwînshi mwà luuya lukolè lwà Nyumà Mwîmpè lùdi lutùlulula makolè à Nzambi nè munyùkunyuku wà ditàbuluja awu. Dîbà adi kùdi masangisha à milòmbò kacya mangàtàngànè, muunya nè bufùku, kasunsa kònsò, myaba yònsò. Mòna's, bantu kî mbaswè mene kuumuka mwaba awu to!

⁴⁷ Ndi mvùluka mu Jonesboro, mu Arkansas mwàmwa, pangàakabanga dyàmbedi wanyì...bu masangisha àànyì miisàtù nàнку awu. Dyàmbedi mu St. Louis, nè pashìishe ku Corning, nè pashìishe kupweka ku Jonesboro kwàka. Cibèjibeji kwamba nè: “Bantu binunu makùmi àbidi nè mwandamukùlù

mu disangisha.” Mu ntàntà wa kilòmèètà makùmi àsàtù nè yìbìdì anyì makùmi ànaayi nè mwandamukùlù kule nè cimenga, muvwà ànu ntentà myasamù. Kùvwakù mwà kupeta nzùbu mu ferme amu wa kusòmbelamù to, mu cimenga cikesè cyà Jonesboro amu. Nènku bantu bàfùmina mu ntàntà yà kilòmèètà, bambùle myëndù, bènda bàpìcila mu bisuku nè meetu, bàngata bi—bisè nè bàlwa.

48 Mwva musòmbè mu cipèèlà dilòòlò kampàndà, nsambila kumpàlà kwà disangisha kubangadi, ke mèmè kumòna nsongààkàjì yà bitende yilwa nè bisàbaatà byàyi nè nshèsheetè mipàya mu mápà mwàbò amu. Pashiishe kumpàlà kwà kufikabò kuntwaku, biimana nè bàtuutula lupwishi ku makàsà àbò, nè bàlwàta nshèsheetè yàbò nè—nè—nè bisàbaatà, nè—nè bàbwela mu masangisha.

49 Kàdi mèmè kubàmòna bàlàadika bânà bààbò bàvwà bàsaama abu mwînshì mwà mashinyi manène à bisemuna àvwà mambule ndanda, nè bàshààla mwaba awu muunya nè butùkù; babàbwikidija tuubùdìmbù nè ntentà, pàvwà mvùla wùlòka, cipeepele cicolè cituuta; kabàyi buumuka pa myaba yàbò ayi to, bindile ànu bwà kubwela munda mwà nzùbu amu.

50 S’ke mwaba wùvwà mpofò yimòna, mpudimaci yùmvwa awu. Kàdi mudimu wà bwambi, dilòòlò edi, wùdi mu ntàntà wa kilòmèètà lukàmà nè makùmi àsambòmbò dyàmwàmwà dyà cyòci aci, kàdi tupya twà ditàbuluja ntujime.

51 Pa kumòna bantu bàbànda mwaba awu bàmba . . . Ufunkuna ànu munu wèbè awu cyanààna, wàmba nè: “Èè, udi witabuuja anyi, mwanèètù?” Kwàjiki, ùvwa pambèlu muyè. Ke cyònsò civwà nè cyà kwenjiibwa. Bàvwa biitabuuja. Ditàbuluja divwa munkaci mwà kukùtuka.

52 Mpindyewu, bayiidi aba bàkaavwa bamòne aci, nè mu mmwènekèlu wa kànàkànà bàvwà nè disànkà, pàvwà Yesù munkaci mwà kwikisha, bwà civwàbò bamòne cyenjiibwe ditùkù adi aci.

53 Nènku ndi ngèèla meeji nè ditàbuluja didi dyènza cintu bu nànkù, cyà nè tudi mpindyewu nè mwoyi mu cikondo cyà cinyànyà, pàdiYe pàmwàpa munkaci mwà kwikisha pankaci pàà masangisha apa, anyi pàà ditàbuluja nè Dilwa Dyèndè. Nènku tudi tucyònkomokela bintu bitùdi bamòne byenjiibwe mu cikondo cyà ditàbuluja edi, byenzedi binène nè bilenga byà dikèma. Cìdi bàà pa buloba bàmba nànsha ciikàle cinyi, twètù’s tukàadi ànu bacimòne cyenzèke! Ndíyi dyamba, mmalelèlè à nè, byàkenzeka.

54 Bàvwà nè cyà kwikala bapetè mpùngà, pàvwà bwàtù bwènda buya bîmpè menemene apu, bwà kwakula Bwèndè, bwà byenzedi Byèndè, bwà mèyi Èndè mamba, bwà buuMaasiyà Bwèndè. Bààbúngì bàà kùdibo bàvwà bafwànyine kwikala . . . bàà ku

bayiidi aba, bàvwa bafwànyine kwikala baakùle bwà bìvwàbo bamòne byenza, bàmbilangana muntu nè mukwèndè.

55 Ànu mutùdi twenza amu, mu cikondo cyà ditàbuluja ku Shreveport, mu cikondo cyà ditàbuluja ku—ku cimenga cikwàbò kampàndà, netwàkulè bwà bwalu abu.

56 Mpindyewu mùshindù awu's ngùvwàbo bènga. Pàmwàpa ùvwa n'Simonà, bu mutwàmbi makèèlèlè dilòòlò awu, uwva wàmba nè: “Èè, pàakangambila Andèlè bwà bwalu Bwèndè, mvwa ànu nè mpatà ndambù. Kàdi pàakangambilaYe nè mèmè mvwa nganyì nè taatù wanyì ùvwa nganyì, aci kàdi kupàtula dyelakana dyònsò mu mèmè. Mèmè—mèmè kuciitabuuja dîbà adi.”

57 Bivwa bifwànyine kwikala nè Filipò ùvwa mufwànyine kwikala mwambè, umwe wa ku bakwàbò awu; bivwa bifwànyine kwikala nè Andèlè ngwakamba. Tuvwa baakùle bwà inàbànzà wa ku ciinà cyà màyi awu, makèèlèlè dilòòlò. Bàvwa bafwànyine kwikala bàakula bwèndè, pàakambambo cintu kampàndà bu nùnkù, “Bànà bèètù, nudi bamanyè's, pàvwa dyànyì dîbà dyà pabwàdi, mpàmvwà—patwàkayà bwà kupeta ndambù wa bintu byà kudyà. Ke twètù kwalukila nè tuvwa biimàne pambèlu pàà bisuku apu, nè twètù kuMumòna ùyiikila nè mukàjì wa luumù lubi ewu. Twètù kudyàmbidila, munda mwà myoyi yètù nè: ‘Kàdi bu bàmwè bàà ku baakwidi mwà kulwa kumòna eci, Mulongeshi wetù ùyiikila nè mukàjì wa mùshindù ewu, ncinyi cidìbo bafwànyine kwamba bwà bwalu Bwèndè?’ Nè pashìishe tudi tuvùluka mùshindù wutùvwà bamanyè, twètù bàvwa nè dyeyemena mu Yèyè nè, cìvwa mbwà kiipàcìlè kampàndà kàvwàYe ùyiikidila nendè.

58 “Nè pashìishe pàakamwambilaYe nè: ‘Ndà ùkangàtè bàyeebè kàdi ùlwe mwab'ewu.’ Nè yèyè kwamba nè: ‘Ncyèna nè bàyaanyì to.’ Mùshindù wàkambà myoyi yètù kwimana, bwalu twakadyàmbidila nè ke musangu wùmwèpelè wùdiku dipangila awu. Yesù ùvwa mwambile mukàjì awu nè ùvwa nè, àyè àkangàtè ‘bàyendè,’ pèndè kàyì nè bàyendè to. Nudi bavùlùke mùvwà kwisù kwètù patwàkatàngilangana muntu nè mukwèndè mumpàla patùvwà tukèma apu, bwà kwela meeji nè dyeyemena dyònsò ditùvwà naadi mu Yèyè adi, kàdi's ke dyòdi didi dyumùshiibwa dyònsò dyàkàmwè edi?

59 “Pashìishe tudi tusangana, dyàkàmwè Yèyè kwakula nè kwamba nè: ‘Udi mwambe bulelèlè, bwalu ukààvwa nè balùme bàtaanu, nè ùdi nendè mpindyewu awu kî ngwebè to.’

60 “Pashìishe pàakaMujingululàye dîbà adi bu Maasiyà, Maasiyà wa Nzambì, nè kwamba mwaba awu, nè: ‘Tudi bamanyè nè Maasiyà ùlwalwa. Wèwè udi nè cyà kwikala Mupròfètà, bwalu tudi bamanyè nè, pààlwà Maasiyà, Yèyè ngwìkala mwà kwenza cyòci eci.’ Nè bujaadiki mu cimenga aci,

bujaadiki bwà mukàjì awu bùvwa nè bwenzeji kùdì bantu bàà mu cimenga aci.”

⁶¹ Pashiishe ùvwa mufwànyine kwikala Yone wa citende awu uvwa mwàmbè nè: “Nudi bamanyè’s, nènnwambile cidi cìcìvwjwe cilelèlè kùndi, ditùkù adi pààkacibulàYe dyàmpà. Mpindyewu, twètù bònsò tuvwa nè nzala, nè Yèyè ùvwa mupàtùke muyè mu cipèèlà, nè katùvwa mwà kuMupeta to, ke twètù kutwilangana Nendè kuntwaku. Nè misùmbà yònsò ayi kulwayi mwaba awu, nènku, katanci aka anyi, twètù kuMusangana wàmba nè: ‘Bàtùmaayi mu cimenga, bwà kupetaku ndambù wa byàkudya.’ Ke—ke Yèyè kutwàmbila bwà ‘kubàdiisha’ dîbà adi. Ke kwangataYe màmpanà àtaanu awu nè tuumishipa tukesè túbìdì atu, nè kucibulaYè dyàmpà adi. Ke mèmè kumòna cyanza Cyèndè pàvwàYe mwà kwolola cyanza bwà kakwàbò kapeke kàà dyàmpà, dyàmpà adi kutuntumuka cyàkàbìdì. Nènku dîbà adi kwalujaYe cyanza, kuditéeka mu dilòngù, pashiishe kwolola cyanza paanyimà, mushipa awu kutuntumuka cyàkàbìdì. Kì ng’ànù mushipa wètù wà ciibidilu ewu to, kàdì ùvwa mmushipa mulàmba, nwamònu’s, wùkaadi mumanè kutuntumuka cyàkàbìdì.

⁶² “Nkapwishipwishi kàà mùshindù kaayi kààkalekelelèYe, bàna bèètù, mushipa mulàmba, dyàmpà dilàmba, kutùpika dikola dyònsò? Nè tuvwa bamanyè nè Yèyè ùvwa Mufùki, kàdì’s n’Yèyè ewu munkaci mwà kwenza bufùki bwà mushipa mumana kulàmba nè dyàmpà dilàmba.”

⁶³ Yone ùvwa mufwànyine kwikala mwambè cintu bu nùnkù ewu. Yèyè nè: “Udi mumanyè’s, pàncìvwà mwànà mutekète, tuvwa basòmbèlè lwà kwínshi ku Yelèkò eku. Ndi mvùluka nè maamù wanyì wa cyena Yudà awu ùvwa nè ciibidilu cyà kungiimbidiya bwà kundàadika mu mapingaja; bwà kulààla tulù twànyì twà mu mapingaja atu. Mvwa nè ciibidilu cyà kumutàngila mu mèsù èndè amu, nè ùvwa mwà kundondela maalù-malonda à mu Bible.”

⁶⁴ Nènku, nudi bamanyè’s, aci’s ncintu cìmpè bwà maamù kanà yònsò ewu kwenzelayè mwanèndè mulela. “Kolèshila mwànà mu njila udiyè nè cyà kulonda.” Mbifwànyine kwikala bimpè kutàmba kuteemesha ntèlèviziyo bwà kubandila bimwè byà ku bintu ebi bìdì bipita ku ntèlèviziyo abi. Citàmbe bwìmpè cyùvwà kwenza nkumubadila bwalu-bulonda bwà mu Bible, bwalu bùdì bùlamata mu meeji èndè makesè amu.

⁶⁵ Mpindyewu kwambayè nè: “Ùvwa nè ciibidilu cyà... Ùvwa nè ciibidilu cyà kundondela bwalu bwà—bwà mukàjì mwena Suunèmà uvwa mwakidile mwanèndè mukesè wa balùme awu mwaluja ku mwoyi, kùdì mupròfetà Eliyà. Mèmè mvwa munangè aci. Pashiishe ùvwa nè ciibidilu cyà kundondela bwà cisàmbà cyètù civwà cifùmina mu Èjiipitù aci. Nènku tuvwa ànu ku Musùlù wà Yadènè aku. Nènku

ùvwa mwà kufunkuna dyàmwàmwà dyà musùlù, nè kwamba nè: ‘Yone, bààkaasa citùùdilu ànu ku luseke lukwàbò lwàlwa. Nènku bàvwa benzè bidimu makùmi ànaayi mu cipèèlà amu, nè Nzambi wàkabàdiisha nè manàà awu. Bilàmbà byàbò kabyàkasùnsukakù nànsha. Nè Nzambi kubàpèesha dyàmpà, dipyadiyà, mu dindà dyònsò.’

66 “Kàdi mùshindù mwinè wùvwà mwoyi wànyì mukesè, wà bwànà awu, mvwa nè ciibidilu cyà kwamba nè: ‘Maman, Nzambi ùtu nè mfuulù minènè yàbùngì muulu mu maulu mwàmwa anyì, bwà kwenzaYe màmpà ònsò aa, nè kulongolola Banjèlò Bèndè bwà kutùùluka nè dyàmpà dyà dindà nè kuditèeka pa . . .?’

67 “‘To,’ mùvwàye mwà kwamba. ‘Yone, wèwè’s ucidi mwànà mukesè bikolè bwà kuumvwa. Nwamònu’s, Nzambi kàtu nè mfuulù mu dyulu to. Kàtu dijinga nè mfuulù to. Twètù mbàdi bàkèngela kwikala nè mfuulù. Kàdi Nzambi kèna naayi dijinga to, bwalu Yèyè m’Mufùki. Nwamònu’s, Yèyè ùdi ànu wàkula cyanàànà, nè dyàmpà didyàdija pa . . . Yèyè’s m’Mufùki.’

68 “Nènku, bàna bèètù, pàmvwà mwimàne mwaba awu leelù ewu nè mMubandila wàngata cipepe cyà dyàmpà aci nè ùcisùnsulula, nènku pààkòlòlàYe cyanza pàanyimà bwà cikwàbò cipepe, cikaavwa cifùkiibwe, mèmè kumanya nè katùvwa twenda tulonda—tulonda mupròfeta wa mashimi to. Awu ùvwa m’Mufùki, Yèyè mwinè, mu Muntu.” Nènku kùdi . . .

69 Dìbà adi bàvwa bafwànyine kwikala baakùle bwà lwidì lwà bàmwè bàà ku bantu; bàmwè bààkiitabuuja, bàmwè kabààkiitabuuja to; nè pashìishe lwidì Lwèndè kùdi bantu abu’s.

70 Mpindyewu, nudi bamanyè’s, bwena Kilistò mbushintùlùke bikolè byà menemene, mu matùkù à ndekeelu aa. Mpindyewu bikèngela bwà wèwè kusèngeleela muntu, kumulaya bintu bùngì cyakaa, kumupèesha bintu bùngì cyakaa, bwà kumufikisha ku diitabuuja, bwà kulwa mu èkèleeziyà, nè kubàlaya nè nebàpetè beena dyàbò bàà batàmbe bwìmpè nè bikwàbò byònsò. Aci kì mbwena Kilistò to.

71 Bwena Kilistò kì mbyà kwengelekangana to. Bwena Kilistò mbukàyàbàle. Cyà bushùwà. Cidi—cidi—ci . . . Bwena Kilistò kì ncikùnyiiibwà cyà dyengeleka mu dikopo to.

72 Cikùnyiiibwà cyà dyengelekela mu dikopo citu cikùnyiiibwà cisopakaja, misangu yàbùngì. Bikèngela ùcipwidijilè manga dìbà dyònsò, bwà kulama bìshiishì abi kule naaci. Aci’s mbwà butekètè bwàci. Nènku’s ke mùshindù awu wùdibi bikèngela bwà nwènù kwenzela beena Kilistò bààbùngì, kwenza bu kubàpwidijila manga nè—nè milayì bùngì cyanàànà.

73 Nwènù, kabyèna binùkèngela nànkù to. Cikùnyiiibwà cilelèlè cishùwashùwâlè cyà mubidi tumatuma kacyèna cikèngela dicìpwidijila manga nànsha makesè to. Bìshi kabitu bicilenga to.

⁷⁴ Bidi ànu bu, leelù ewu, mùshindù wùdì muntu ùteeta kwangata bintu bwà kubinyangakaja. Nzambi, ku cibangidilu, Wàkamba nè: “Dimiinu dyònsò òvulunganè bilondèshile mùshindù wàdì.”

⁷⁵ Mwya mbala mu *Reader's Digest* emu, mùdìbò—mùdìbò bàngata citùdì tubiikila nè nditalà disopakaja, nè dyenza mwepu mulenga mutàmbe, bushùwà, mwepu mwìmpè munène mutàmbe; kàdì kí ndìmpè to, kadyèna nè bwà nsongo to. Nè bàdì bènza kàmata katàmbe bwìmpè, kakèèna nànsha nè mwenya wà kàmata to, nè bènza, bàdì mpindyewu nè nzòdò udi kàyì nànsha nè mapwàpwà to. Disopakaja's! Nwamònu anyì?

⁷⁶ Nènku mpindyewu, vùlukàayi nè, udi mufwànyine kwikala nè ditalà disopakaja, kàdì kwèna mwà kukùna dimiinu adi cyàkàbìdì to. Kadyàkupàtulakù dikwàbò kàbìdì to. Nedifwe. Bwà cinyì? Kadyèna nè mwoyi munda mwàdì to. Bikèngela ùdisopàkàjè dībà dyònsò. Dyòdì kadiyì disopakaja to, òvwa mwa kutùngunuka ànu nè kuvulangana. Acì's cidi cìleeja nè dilondangana dya nshintùlùkìlu, bilondèshile meeji à muntu's, mmashimi.

⁷⁷ Udi mwà kwangata dishinà dyà—dyà kàbalù nè mpundà wa mpànga, kàdì kubisambakaja pàmwè nè kupeta kampundu, kàdì kampundu kakèèna mwà kulela kampundu kàbìdì to. Bwàkù bwalu mbutùuke. Kwàjikì. Kwàkù nkumanè kujika.

⁷⁸ Nènku bàdì bàmba mpindyewu nè, mu bidimu bikwàbò makùmi àbìdì kumpàlà eku, bóbò kabàyi bakàndike bantu aba bwà kudyàbo bintu bisopakaja ebi to, bu mùdì matàlà nè blé nè bintàkanyì bidìbò munkaci mwà kusopakaja ebi, nè: “Bìdì bishintulula mbùngakeenu wa—wa mubidi wà bakàjì. Kabàakupeta mùshindù wà kulela bānà, mu bidimu makùmi àbìdì kuumukila ku mpindyewu to. Bìdì munkaci mwà kushipa lukòngò elu.” Kacyèna nè bintu munda mwàcì to.

⁷⁹ Muntu mulùme kí mmwenza mùshindù wàkadiye to. Tàngilàayi muntu mulùme leelù ewu. Mòna's, bóbò balùme, kale wàwa, manàyi à ndundu àvwa makàyàbàle. Mpindyewu bikèngela bàlwate bifulu ku mutù; ku cidimu cyònsò eci bàdì bàshipa makùmi à bantu, ànu ku dituuta bintu ku mitù bu kambocya, ùfwafwa ànu mpindyewu; ku mvità nè bikwàbò byònsò. Muntu's mmwenza ànu nè mushiki wà bitoci. Bìdì, nènku bìdì bwà bintàkanyì bisopakaja abi, kàdì's mbinyangàkàjè ndongolwelu mujimà wa—wa mwoyi wètù, bubanji bwètù bujimà.

⁸⁰ Nènku—nènku—nènku disopakaja dyà mamiinu adi ndibwele mu èkèleeziyà, kàbìdì. Pamutù pàà kwikala nè musumbà wà beena kwitabuuja balelèlè bakàyàbàlè bàà Bible, mbacisopàkàjè ku màngumba. Nènku bikèngela bwà kwambabò nè: “Ndi nè *cikampàndà*, ndi nè *cikansanga*; nè ndi

wa mu *cikampàndà*, nè ndi wa mu *cikansanga*.” Ncisopakaja, nènku cintu aci kacýèna mwà kudivudija cyàkàbìdì to.

⁸¹ Bidi bitùkèngela cyàkàbìdì Mukàndà wà Byenzedi. Kàdi mùshindù wùmwepele wuwikalà mwà kucyèenza ngwà kwalukila ku Bible, nè kuumuka ku yimwè yà ku ntèndeleele misopakaja eyi.

⁸² Disopakaja dyà mamiinu, bikèngela kwengelekangana’s! Kì ndiitabuuja to! Ànu mushiki wà—wà bantu bamòtòke, ànu batulùmùke, bengelaka bwà kubàbweja. “Ndi. . .” Mémè nè: Udi mwena Kilistò anyi? “Mémè ndi Méthodiste.” Udi mwena Kilistò anyi? “Mémè ndi Presbytérien. Ndi mwena Mpenta.” Aci kacýèna cyùmviwija *aci* to, kùdì Nzambì. [Mwanèètù Branham ùdì ùtuuta cishòndò—Muf.]

⁸³ Udi mwena Kilistò bwalu udi mulediibwe mu Nyumà wa Kilistò, nè Dîyì dyà Nzambì dìdì nè mwoyi munda mwèbè.

⁸⁴ Nudi bamanyè’s, mémè ntu misangu yònsò nsànka nè kàbalù keena diìnà kakùna ku dikàsà. Nudi bamanyè’s, kòkò kàdi nè cyumvwilu. Udi mwà—udi mwà kukàlongesha bintu, kukènzela bintu, nè kòkò nekàyiilè. Kàdi wèwè mwangàte kampundu kàà kale, kwèna mwà kukènzela cintu nànsha cìmwè to. Kòkò’s kàdi ànu mpundà munène wa kale wa maci maleepesha. Ùdì ùsòmba mwaba awu, nè, udi mwà kuyiikila nendè, ùdì ùshààla mubàwùle maci, nè: “Huh? Huh? Huh?” Nwamònu’s, aci’s, yèyè’s ùdì ànu musopakaja.

⁸⁵ Cìdì cìmvùlwija, bààbúngì bàà ku beena Kilistò bàà ku dîna aba, basopakaja, ntèndeleelele wa mpundà. Udi ubàmbila nè Yesù Kilistò ùdì umwèumwè awu makèèlèlè, leelù, too nè kashidi; bàmba nè: “Mémè ncyèna nCìitabuuja to.” Nwamònu anyi? Nè pa nànkù kwèna mwà kumulongeshakù cintu nànsha cìmwè to. Mmunyi mùdì mwà kumulongesha; yèyè ùkaadi muyè, nànsha bishi. “Wanyi èkèleeziyà ùdì ùCìitabuuja mùshindù *kampàndà*. Wanyi mémè ùdì ùCìitabuuja mùshindù *kansanga*.” Kàdi Dîyì dyà Nzambì dìdì dyàmba nè Yèyè ùdì ànu umwèumwè awu makèèlèlè, leelù, too nè kashidi! Mémè ncìtu muswè mwena Kilistò musopakaja to.

⁸⁶ Mémè ntu muswè—muswè kàbalù kakùna ku dikàsà. Kòkò nkamanyè nè papa wakù ùvwa nganyi, maman wakù ùvwa nganyi, nè kakwakù mulùme nè kakwaku mukàjì ùvwa nganyi. Yèyè’s mmumanye nkòngò yònsò yidì milondàngàne paanyimà pònsò apu.

⁸⁷ Ki mùdì mwena Kilistò mukùna ku dikàsà, yèyè mmumanyè nè Tatwèndè Nganyi’s. Yèyè mmufùmìne ku Nzambì; Yèyè ùdì Dîyì dyà Nzambì, Yèyè ùdì umwèumwè awu ànu mwàkadìYe kwònsò aku amu. Yèyè ncintu cilelèlè cikùna ku dikàsà cyà Nzambì, Dîyì dyà Nzambì dìdì munda mwèndè, Yesù Kilistò ùDimwènesha.

⁸⁸ Musumbà wà beena bupidyà! Yesù ùvwa muswè kunyùkusha musumbà wà twishi dīngà ditùkù, Ùvwa nè bantu bapite búngi bàvwà bàMulonda. Ùvwa nè bayiidi Bèndè. Pashiishe, Ùvwa nè makùmi mwandamutekète abu, nsangilu wa bambi awu. Pashiishe, Yèyè ùvwa nè disangisha, ku binunu nè binunu. Ke pashiishe kwambaYè diyì edi, KwambaYè nè: “Nwènù kanùyì badyè Mashi... badyè munyìnyì wà Mwànà wa muntu, nè banwè Mashi Èndè to, kanwèna nè Mwoyi munda mwènù to.”

⁸⁹ Mpindyewu nudi nwela meeji nè ncinyi cìvwà ngàngàbuka wetù wa mulonge maalu à manga ewu mufwànyine kwamba, yèyè musòmbè mu batèeleji amu? Nudi nwela meeji nè ncinyi cìvwà muntu wetù wa wèla meeji bimpè ewu mufwànyine, citùdi tubiikila nè ngeelèlù wa meeji mujaalame aci? Yèyè kàakacyùmvwija to. Kabìvwa bikèngela bwà kucyùmvwijaYè to. Mòna’s, ngàngàbukà’s ùvwa mufwànyine kwamba nè: “Umùkaayi kùdi Muntu awu. Mmupâle. Yèyè... Netwikale mikishi minù yà mashi à bantu. Kunwà Mashi à Muntu, kudyà mubidi Wèndè?”

⁹⁰ Nè disangisha adi, ndi mwà kudifwànyikijila nè mwakwidi wàkamba nè: “Cikondo ncyòci eci. Ke mwaba wutùdi tubwelela ewu. Twapàtuku twayi! Katwàkubwelakù mu dikwàbò dyà ku masangisha to.” Ke bôbò bàyaayà bàba. Dìbà adi, Yèyè kubàsàka bônso kule Nendè.

⁹¹ Pashiishe Yèyè kukùdimuka nè kwambilaYè makùmi mwandamutekète abu, Yèyè wàkamba nè “Nenwàmbè cinyi panwàmònà Mwànà wa muntu ùbànda mu Dyulu mwàkafùmàYè?”

⁹² Mpindyewu, makùmi mwandamutekète abu kwambabò nè: “Mwànà wa muntu ùbànda kùdiYe mufùmīne? Mòna’s, Ùvwa neetù ku cidiilù cyà nyama kwàkalediibwàYe aku. Tudi bamanyè mamw’Èndè. Tudi bamòne bilàmbà, lubondya lwà mukùsu mùvwàYe mujìngila amu. Wàkalediibwa mu Betèlèhèmà wa Yudà mwàmwa. Wàkakoleshiibwa lwà mu Nazàlèètà emu. Bânà Bààbò bàà balùme, bânà Bààbò bàà bakàjì mbôbò aba, nè bônso tudi naabò mwab’ewu. Kàdi pashiishe Wàmba nè: ‘Mwànà wa muntu ewu wàkabànda?’” Mpindyewu, Yèyè kàakacyùmvwija to, Wàkacyàmba ànu cyanàànà. Mpindyewu, kabàvwa mwà kucyùmvwija to, kabàvwa mwà kudifwànyikijilaci mu meeji àbò to. “Èè,” mwàkambabo, “mwab’ewu ke wutùdi tubwelela,” ke kupàtukabò. Aci’s ki cyònsò cìvwàbo mwà kutwàla.

⁹³ Bàcitu ànu nè bisumbù bimwèbimwè abi. Ncyà bushùwà. Tucidi ànu naabi. Tudi tumòna’s.

⁹⁴ Pashiishe Yèyè kukùdimuka. Vùlukàayi nè, nànsha bayiidi abu kabàvwa mwà kuumvwija aci to, bôbò pààbò, kàdi’s bàvwà nè diitabuuja. Pashiishe Yesù kukùdimuka è kutàngila dikùmi nè bàbidi abu, kwamba nè: “Nudi baswè kuya pèènù anyi?”

95 Pashiishe ke Peetèlò kwambayè méyi à mushinga mukolè awu nè: “Mukalenge, kutùdi bafwànyine kuya mpenyi? Bwalu tudi batwishiiibwe menemene, tudi bamanyè nè Wèwè udi nè Díyì dyà Mwoyi, nè ànu Wèwè nkààyebè.” Nwamònu anyi? Kabàvwa mwà kuumvwija mùvwàbo mwà kudyà mubidi Wèndè nè kunwà Mashì Èndè to. Kabàvwa mwà kuumvwa mùvwàYe mwà kubànda kùvwàYe ùfùmina to, pàvwàYe mulediibwe ànu mu Betèlèhèmà. Kabàvwa mwà kucyènza to. Kàdi, nwamònu’s, diitabuuja kaditu dipangilakù to. Ndyelè lwongò. Didi dishààla mwaba awu, nànsha bàmbè ncinyi. Kushààladi mwaba awu. Bàvwa balongolwela Mwoyi ewu. Nè Yèyè ùdi... Bààkashààla mwaba awu.

96 Mpindyewu mishindù mishiièshiiàngàne ayi. Bàmwè bààkiitabuuja. Bàmwè bààkamba nè: “Muntu kacya kàtu mwànji kwakulakù nànkù to.” Bàmwè kabàvwa biitabùùje to, ke kwambabò nè: “Kaa, aci’s, mbafwànyine kwikala bacyakùle.”

97 Bàmwè bààkamba nè: “Muntu kacya kàtukù mwànji kwakula bu Muntu ewu to. Kùdi cintu kampàndà cyà pabwàci kùdiYe. CidiYe wàmba aci, Yèyè ùdi nè bukolè bwà kucitwà nyama ku mikòlò.” Èè, bààkamba nànkù, nudi bamanyè’s, kwamba nè: “Yèyè kèna wàkula bu mwakwidi to. Yèyè kèna wàkula bu laabi to. Bwalu cidiYe wàmba aci, Nzambi ùdi ùcitwà nyama ku mikòlò, Ùdi ùshìndika cidiYe wàmba aci.” Kaa, ekèlekèle!

98 Ùvwa nè cyà kwikala Yone wa citende awu, díbà adi, wàkamba nè: “Anji elàbi meeji ku bwalu abu’s! Twètù tudi Nèndè mpindyewu mene. Ndisàmbiibwa kaayi dìdici nè cyà kwikala’s wè! Dikùbiibwa kaayi’s wè!” Dikùbiibwa kaayi divwàci nè cyà kwikala bwètù twètù’s wè!

99 Mémè’s ndi mpàndànjlà, munyùngùlùke buloba misangu nè misangu. Nè nkààdi mumòne ntèndeleele yà mishindù yònsò nè nzambi yà mishindù yònsò yidibo naayi, nzambi yà cimpàngaanù ayi; ba-Mùzùlùmanyi, beena Bouddha, nè ba-Sikh, ba-Jains, kaa, ní ncinyi cikwàbò cyònsò, nè nzambi yà bampàngaanù yà beena mu bifuku ayi. Kàdi, yònsò wa kùdibo, kakwèna nànsha umwe wa ku yòyi udi mubingè to pa kuumusha bwena Kilistò. Yònsò wa ku yòyi, bayijuudi bàayi mbafwè, nè bàdi nè lukità mùvwàbo bajiiikiibwe. Kàdi bwena Kilistò ke bùmwèpelè bùdi bwà cyà bushùwà, bwalu Mujuudi wetù wàkafwà, kujiikiibwa, kàdi kubiika ku lufù, nè tudi mwà kujaadika nè Yèyè ùdi nè mwoyi.

100 Ku lukità lwà Mùhamàdi, munda mwà bidimu binunu bìbìdi bishààle ebi, bu nànkù awu, kùdi kàbalù katòòke, bàshintulula balami ku mèbà bùngì kampàndà, bindile bwà Mùhamàdi àbiikè ku bafwè nè àbànde pa kàbalù ànyùnguluke buloba nè àbùcimùne.

¹⁰¹ Kàdi Yesù ùkaadi mumanè kubiika ku bafwè, mumanè kubiishiibwa munda mwà bidimu binunu bibìdi, nè ùdi neetù dilòòlò edi. Nè pashiishe patùdi tumòna mîdimà, nè tumòna ndekeelu wa cikondo, mùshindù wùdibi mpindyewu, bilwa bitàngile ku mèbà atùdi nè mwoyi aa, patùdi munkaci mwà kwendela pa mbù munène wa mwoyi, pàdi mbù mu cipeepèlè cicolè, nè—nè kaabwatù kafwànyine kucibuka díbà kanà dyònsò, makènkè makesè aa àdi mwà kujimà mùshindù *awu*. [Mwanèètù Branham ùdi ùtuuta cishòndò—Muf.] Anyì, tudì bafwànyine kubènga kuumuka mu nzùbu emu dilòòlò edi, muntu nànsha umwe wa kutùdi. Katwèna bamanyè nè ndìbà kaayì dyàlwà lufù to.

¹⁰² Nènku n'njiyà yà dikubiibwa kaayì yìvwàci nè cyà kwikala, bwà bayiidi abu, bwà kumanya nè Mufùki mene awu, uvwa muDìmanyishe mu kaabujima bwà nè ke Mupèrsònà awu, uvwa naabò pa mbù apu.

¹⁰³ Kàdi mmeeji kaayì mabènèshiibwe awu's, nditèkemena dibènèshiibwe kaayipu's, nditwishiibwa kaayì adi's, mu díbà dyà mîdimà edi ku ndekeelu kwà bwalu-bulonda bwà buloba ebu, bwà kumanya nè Mufùki ùdi neetù pa mbù munène wa mwoyi ewu, bàswikilamù mu bukùbi's! Maabòmbè, cyònsò cìdi mwà kulwa, àlwe, àtaayike, àbwayike, cyònsò cìdibo baswè aci, kabyèna nè cìdibi bishintulula kùndi mèmè to, ndi munkaci mwà kwendela pa mbù nè Mufùki. Dikubiibwa kaayì's wè, pàndi munkaci mwà kwendela pa màyi aa!

¹⁰⁴ Mpindyewu pàvwàye wàkula apu, wàkula Bwèndè, bwà bintu binène bìvwàYe mwènzè. Paanyimà pàà dicyònkomoa dyà ditàbuluja, Yesù uvwa pàmwpa munkaci mwà kwikisha mùdiYe wènza mpindyewu emu, mungàmbi, pankaci pàà matabuluja. Nènku twètù...bàvwa bamanyishiibwe bitòoke tòò nè Yèyè uvwa Nganyì. Bantu bàvwa bamanyè nè Yèyè uvwa Nganyì, munkaci mwà aba bàvwàYe ùfofomija. Kàdi aba bàvwà bakwàte Mifundu, bwalu bàvwa bamanyè nè Mifundu... Dìyì dyà Nzambi ndifidìibwe, dikumbàne, kùdi lukòngò nè lukòngò lwònsò, nè mulayì wà cikondo aci wùdi nè cyà kuula. Nè Yèyè wàkuuja ànu menemene cìvwà nè cyà kwenjiibwa mu cikondo cyà Maasiyà aci. Yèyè wàkakumbànangana nè ngiikàdilù yònsò uvwa ukèngediibwa awu. Pashiishe twètù... uvwa mutwishiibwe nè Yèyè nguvwa Muntu awu.

¹⁰⁵ Kàdi, nudi numòna's, Yèyè uvwa mutàmbe kwikala wa ciipanshì. Kàvwa uvwàla bu mwakwidi to. Yèyè, kàvwa, kàvwa nè dilonga dyà tulaasà bu—bu mutùdi bafwànyine kubiikila nè ndilonga dyà tulaasà to. Katwèna nè bujaadiki nànsha bùmwe bwà nè Yèyè wàkayakù mu kàlaasà to. Kàdi kùvwa cintu kampàndà mu Yèyè cìvwà cishiilàngàne.

¹⁰⁶ Ke pashiishe Yèyè kubàlomba, pàvwàbo kabàyi mwà kuumvwa to, kwamba nè: “Kenkètaayi Mifundu, bwalu mu

Yôyi amu mmunùdì nwela meeji nè nudi nè Mwoyi wà Cyendèlèlè, kàdi's ke cintu cidi cìMfidila bujaadiki ncyòci aci. Yidi yìnwàmbila nè Mémè ndi Nganyì."

¹⁰⁷ Nènkù mpindyewu, vùlukàayi nè, bàvwa nè byònsò ebi mu mwoyi wàbò nè biikàle munkaci mwà kwelangana meeji ku bintu ebi. Kàdi pàvwàbò munkaci mwà kwendela pa mbù apu, mùshindù wùvwàbò mwà kwikala bu bânà, pàvwàYe ànu naabò mu màzuwà amu apu.

¹⁰⁸ Mpindyewu, mulundà wanyì, cìvwa cìkèngelà bwà aci kutwènzèlaci's! Yesù Kilistò umwèumwè mumanyishibwe awu, Mufùki umweumwe awu, Nzambi umwèumwè awu, ùdi neetù dilòdòlò edi. Dikùbiibwa kaayi adi's—adi's, njiyà kaayipu's wè, bwà kumanya nè Bwikadi Bwèndè bùdi kaaba aka.

¹⁰⁹ Mpindyewu tudi tusangana nè, ànu pàvwàbò munkaci mwà kupicila mu cikondo cyà dicyònkómoka eci, dyàkàmwè, lutàtu kujuukalù. Màzuwà è kutèènkakana, mpeepu kubùuka, màyi kuula mu bwàtù. Ditèkemena dyònsò dyà disùngidiibwa òvwa diyè.

¹¹⁰ Mpindyewu, kabyèna bikèmesha anyì, ànu mùdibi mpindyewu emu, patùdi twenda tupweka batàngile ku ndekeelu mpindyewu apa, kabyèna bikèmesha anyì? Tudi mwà kuyiikila bwà mùshindù ùdiYe munène; tudi mwà kulonda mùdiYe munène, mu èkèleeziyà wetù patùdi tufila bujaadiki; tudi tulondela bèètù—bèètù beena mudimu, bamfùmù bàà mudimu, mùdiYe munène; tulondela bantu mu mùsèèsù mùdiYe munène; kàdi, pàdi lutàtù lùtuuta, tudi tulubakana. Nwamònu anyì? Tudi ànu. . . Nwamònu anyì? Bintu bitùdi bamòne Yèyè wènzà abi, bintu bitùdi bamanyè nè Yèyè ùdi wènzà ebi; kàdi lekèlè ànu disaama dikesè, anyì lutàtù lukesè lùlengè nzùbu, tàngila cidi cyènzeka; byònsò bishààle tusùnsukila, ditèkemena dyònsò—dyònsò diyè.

¹¹¹ Nànsha mwàkadibo baMumòne wènzà bintu byàbùngi menemene; byònsò bipwìbwà mwoyi pàdi lutàtù lùkwàta.

¹¹² Bu mùdi mpindyewu, tudi bamòne ditàbuluja dinène edi, tudi nè maalu-malonda à matàbuluja makwàbò manène awu, tudi nè Bwikadi Bwèndè, tudi bamanyè bintu ebi, nè mîngà misangu lutàtù lùdi lùbwela mu mùshindù wà katùyì mwà kulùjikija to. Bòbò. . .

¹¹³ Cileejilu bu mùdi mpindyewu, tudi nè lutàtu mu èkèleeziyà yètù mpindyewu. Tudi nè ntàtù yà cyena màngumba, makòkyanganyi mu èkèleeziyà yètù. Katwèna bamanyè cìikalà mwà kwènzeka nànsha. Tudi tumòna cintu cinène munkaci mwà kudìfwimba kuntwaku. Twètù bònsò beena kwitabuuja mu Bible tudi tumòna nè cintu kampàndà cidi pabwìpì nè kwènzeka. Kakwèna muntu nànsha umwe udi kàyì mucimanyè to.

114 Nè èkèleeziyà yònsò neyitwadiibwè mu Nsangilu wa bukwântèdeleelu wa Maèkèleeziyà awu. Pashiishe, panùdi nwenza nànkù, nenùjimijè dilongesha dyènu dinène dyà butangadiki dyà mu Bible adi. Nè beena Mpenta munkaci mwà kusànka naaci, bàbwelamù buludì, byenze bu ngulube mutàngile ku cishipeelu cyèndè, ncyà bushùwà, nsangilu wa bukwântèdeleelu. Balombodi banène bààbùngi bàà beena Mpenta bàdi bàpetangana naabò. Ndi nnwàmbila, kanùdidingikù kutwà dyùlù dyènu mu cintu bu nànkù to. Ke cyôci aci menemene cidi Bible mwâmbè nè necyènzekè. Ke nyama wa lwonji awu nè cimanyinu, nè, mu bupwàngàne bwònsò, byònsò bitèeka ànu mu bulongàme, nènku tudi tumòna eci nè tudikonka nè ncinyi ciikala bipeta byàci.

115 Lutàtù lubwela. Kàdi bóbò bààkapwà mwoyi nè Yèyè mwinè uvwabò bamba awu, Mufùki mene awu, wàkadi naabù mu bwàtù amu.

Mpindyewu wèwè udi wamba nè: “Bu mèmè mwà kwela meeji awu!”

116 Èè, vùlukaàyi nè, twètù tucidi ànu Nendè, bwalu Yèyè ùdi Díyi, misangu yònsò. Mu Yone 1.1, mutwàmbi makèlèlè dilòlò awu nè: “Yèyè ùvwa Díyi; nè Díyi dyàkavwijiiibwa mubidi nè dyàkasòmbela munkaci mwètù.” Nè twètù tucidi ànu nè Díyi Dyèndè didi ditùludika ku meeji Èndè nè byenzedi Byèndè bwà ditùkù edi. Nwamònu anyi? Kùdi... Kí mmeeji àvwà naawù Mòsà mu ditùkù dyèndè to, kí mmeeji à bayiidi to, kí mmeeji à Luther to, anyi Wesley, anyi cikondo cyà beena Mpenta, anyi cyònsò cyà ku byôbi abi. Tudi nè Bible mwab'ewu udi utwàmbila ciikalà mwà kwenzeka mpindyewu. Nwamònu anyi? Tudi tumòna ditàbuluja dyà beena Mpenta mu Bible, dyà ba-Luthériens, nè bikondo byònsò byà èkèleeziyà abi. Tudi babimòne. Kàdi tudi kàbidi nè Mufundu mwaba ewu wùtwàmbila ciikalàku mpindyewu. Nènku aci's n'Nzambi, Nzambi munkaci mwà kuumvwija Díyi Dyèndè Yèyè mwinè bwà cikondo citùdi nè mwoyi eci. Yèyè ke mumvwiji wa Yèyè mwinè. Kàdi, nànsha nànkù, tudi ànu tulubakana. Kanùlubakanyi to.

117 Bayidi Bèndè mîngà misangu bààkapeta ntàtù yà mubidi mu mûshindù wà kabàyi mwà kuyijikija to, bu mùdi bubèedi, kansêrè, nè bikwàbò, bidì bangàngàbukà kabàyi mwà, kabàyi bamanyè cyà dyenza pa bwalu abu to. Twètù, ànu bu bóbò, tudi tupwà mwoyi Ewu udi mu màzuwà awu.

118 Bivwa bikèngela bwà kwikalabò bamanyè nè Yèyè ùvwa mumanyè bintu byònsò ebi. Ùvwa mumanyè nè bivwa nè cyà kwenzeka. Yèyè ùvwa... Ùvwa mumanyè bintu byònsò, pa nànkù Ùvwa mumanyè nè cyôci eci cívwa mwà kwenzeka. Cívwa nè cyà kubènzekela. Bwà cinyi Ùvwa ùcilekela cyènzeka? PààkabwelàYe mu màzuwà amu, Ùvwa mumanyè nè cívwa nè cyà kwenzeka.

119 Yêyè mmumanyè nè tuvwa nè cyà kukùngamangana nè ngiikàdìlù ewu, nè Yêyè ùkaadi mudyànjile kutwàmbila kaaba aka mu Bible nè nebiikalè mùshindù awu.

Mpindyewu civwàYe wènta aci ncinyi? Ûteeta diitabuuja dyàbò.

120 Bwà cinyi bùvwàYe mufwànyine kulekela mu—mu—mukàjì mukesè mulenga, wa mmwènekeli wa maamù musòmbè mu dikalù dyà balèmà, mùshindù awu? Bwà cinyi bùvwàYe mufwànyine kulekela nsongaàlùmè milenga kaaba aka, nsongaàlùmè yidì misòmbè mu tùkalù twà balèmà etu eyi, bainàbànzà, nè bikwàbò? Bwà cinyi bùvwàYe mwà kwenzela nànkù? Kàdi, nànsha nànkù, mbafwànyine kwikala bacibùkile panshi, biikàle ànu nè nsòmbèlu wetù wa ciibidilu ewu. Kàdi kùdi mwà kwikala bàmwè basòmbè mwab'ewu nè dĩaamà dyà mwoyi, nè, Nzambi Yêyè kàyì mukwondòpe to, udi mwà kwikala mufwè kumpàlà kwà kucyàbu mu dindà. Ncyà bushùwà. Ûvwa mumanyè nè civwa nè cyà kwenzeka. Pàmwàpa ncyenzèkè bwà kwela diitabuuja dyètù ku diteeta. Ke bwà cinyi cyàkabènzekela. Yêyè ngudi mwàmbè nànkù. Nwamònu anyi? Byà mwomùmwe mpindyewu.

121 Wàkajaadika nè Yêyè ùvwa Nganyì, ku Mêyì nè bimanyinu byàkajaadikàYe munkaci mwàbò amu, bwà nè Yêyè nguvwa Maasiyà mushindikiiibwe, mwela maanyi uvwa nè cyà kulwa awu.

122 Nè Yêyè mmujaadike munkaci mwètù, ku Dibàtiiza dyà Nyumà Mwimpè nè dyalukila dyà bintu byàkalayàYe mu ditùkù edi, bìvwàYe mwà kwenza abi. Yêyè mmujaadike nè Ûdi kaaba aka. Ûdi ùjaadika nè Yêyè ùdi umwèumwè awu makèèlèlèlè, leelù, too nè kashidi. Nènku nudi numòna mùdibi bipeepèlè bwà twètù kulubakana ku cintu kanà cyònsò anyi? Katùvwakù nè cyà kucilekela cyènzeka to. To.

123 Yêyè kwamba nè: “Mémè ncìyì ngènta byenzedi bìdì bifùnda bwànyì Mémè to, dībà adi kanùNgiitabùùjì to.” Nènku piikalà Èkèleeziyà, piikalà Nyumà Mwimpè leelù ewu kàyì wènta bintu bìvwàye nè cyà kwenza bwà dībà edi to, dībà adi kanwitabuuji Mukenji to; nudi nè bukenji bwà kubènga kuWitabuuja.

124 Kàdi Yêyè wàkalaya nè bintu bìdìYe munkaci mwà kwenza mpindyewu mene ebi nebiikalè munkaci mwà kwenzeka pa dībà edi mene. Pa nànkù bìvwà bìkèngela bwà kutùfikishaci ku didyùmvwa bakùbiibwe menemene, twamba nè: “Nènye ku disangisha. Nyumà Mwimpè munène awu, mùndì ngùmva, ùdi kuntwaku munkaci mwà kubuulula minsokòntù yà mu myoyi yà bantu.” Ke cyòci aci menemene cyàkambàYe nè Neènzè pàvwàYe mwà kubuuludiibwa mu matùkù à ndekeelu. Yesù Kilistò wàkamba, Yêyè mwinè nè, ke cyòci aci menemene civwàYe mwà kwenza.

125 Nè Yèyè wàkamba nè: “Buloba nebwikalè mu ngiikàdilù wa mwàkadibù mu matùkù à Sodomà.” Mpindyewu’s ke kùdibu. Wàkamba nè: “Èkèleeziyà neyìikalè mitàpùlùke, ànu mwàkadiyi dībà adi amu,” Lotà, wa civùmvù awu, mu Baabùlòònà mwàmwa, anyi mu Sodomà mwàmwa, nè beena Sodomà. Wàkamba nè: “Abraham, kasùmbù kasungula, kabìikidiibwe bwà kupàtuka aku,” nè kutùmaYè mùsànjeelà kùdi kasùmbù kasungula aku. Kàdi kutùmaYè mùsànjeelà yibìdi kùvwàbo aku, yìleeja muntu nè muntu. Nènku’s ke cyòci aci cidiYè mwenzè, nànsha mene too nè ku dīnà dyònsò, cyenzedi cyònsò, dinyungakana dyònsò, byònsò ànu mu byòbi menemene, cimanyinu cyònsò, dimwènèshiibwa dyònsò, ànu mùshindù wùmwèwùmwè menemene. Yèyè wàkamba nè nebyènzekè.

126 Mpindyewu citùdi tuumvwila bwòwà ke cinyi’s? Bintu ebi bìdi neetù bwà cinyi? Yèyè ùdi munkaci mwà kutùteeta, bwà kumòna citwènta pa bwalu abu. Mònaayi.

127 Wàkabàmbila, wàmba nè: “Mpindyewu, panwikalà kanùyì mwà kungiitabuuja Mèmè to, itàbùùjaayi byenzedi bīNdi ngènta; byòbi mbidi bijaadika nè Mèmè ndi Nganyì.” Bivwa bikèngela kwikalabò bacimanyè, kàdi kabàvwa bacimanyè to. Bòbò. . .

128 Yèyè ùvwa Nzambì, Wàkafùka, Mufùki wa mpeepèlè nè mbù awu. PìikalàYe mwà kufùka mpeepèlè nè mbù, Yèyè kàvwakù mwà kubifikisha ku ditùmikila Dīyì Dyèndè anyi? PìikalàYe mufùke bintu byònsò, Yèyè kèna mwà kufifikisha bintu byònsò ku ditùmikila anyi? Twàvùlukaayi, kàbidi nè, Yèyè wàkafùka mibidi yètù, nebiKèngele bwà yòyì kutumikila Dīyì Dyèndè. “Èè,” mùdi wamba, “bu mèmè ànu mwà kwikala mutwishiiibwe bwà cyòci aci.” Èè, s’tudi batwishiiibwe bwà cyòci aci. Yèyè ùdi kaaba aka bwà kucijaadika nànkù. Bikèngela yìcitùmikile. Vùlukààyi’s. Bikèngela bwà Yèyè. . .

129 Patùdi balàadika, katùyì cingà cintu to ànu nkutu wa butù, Yèyè mmulayè bwà kubiiisha butù abu. Yèyè’s wàkalaya bwà kubùbiisha. Bikèngela bwà mubidi kuMutùmikila. Nènku ke bwà cinyi patùdi tufwà, tudi twikisha nè ditwishiiibwa dyònsò nè netùbiishiibwè ku lufù, bwalu Yèyè mmulayè nè Ùvwa mwà kucyènta. Nè mulayi Wèndè n’Dīyì Dyèndè, nè tudi twitabuuja. Udi witabuuja dibiiikà dyà ku lufù dyà mubidi anyi? Bushùwà’s. Wèwè kùyì nànkù to, kwèna mwena Kilistò to. Pa nànkù tudi twitabuuja nè Yèyè neatùbiishè ku lufù ku matùkù à ndekeelu. Yèyè mmulayè bwà kucyènta. Nènku ncinyi aci? Aci’s n’Dīyì Dyèndè. Ke mwaba wutùdi tuswikila bintu byònsò bitùdi naabì, ànu pa Dīyì adi.

130 Nè pashiiishe pàkaadibi bīkafika ku eikondo citùdi tumòna Dīyì munkaci mwà kumanyishiibwa, nè dīdi neetù; dībà adi tudi bu bayiidi, mu bwalu bukwàbò pàvwàbo pambèlu pa mbù apu, nènku—nènku bàvwa bàmba kutùkina cyàkàbidi, mu

mpùngà mukwàbò. Ke kumònabò Yesù ùlwa wènda wèndela pa màyi, ke kukwàcikabò bwôwà. Kwambabò nè: “Mm—mmukishi. Bìdi bikwàcisha bwôwà.” Biikàle nè bwôwà nè ùvwa nyumà kampàndà, ke kwelabò mbilà yà bwôwà. Cintu cimwèpelè cìvwàku mwà kubàkwàcisha aci, bàvwa naaci bwôwà.

¹³¹ Nènku ke mùdibi kàbìdì leelù ewu, cintu cimwèpelè cìdì mwà kwambulwisha bantu, bàdì bàciciìna. Yèyè nè: “Kanùciìnyi nànsha. M’Mémè.” Yèyè kwakula. Mmunyi mùdì mufwànyine kumanya nè ùvwa n’Yèyè? Mmumanyishiibwe ku Dîyi Dyèndè. Ke mùshindù awu wàkamanyishiibwàYe musangu wà kumpàlà. Mùshindù awu ngùdìYe ùmanyishiibwa musangu wònsò, ku Dîyi Dyèndè. Mònaayi’s.

¹³² Paanyimà pàà bayiid-... bayiidi aba bamanè kudisangana ku ndekeelu, bìvwa nè cyà kwikala bifikile bàmwè bàà kùdìbò bwà kujingulula nè Mufùki ùcìvwa ànu naabò.

¹³³ Ndi ntèkemena nè cìdì cìtwènzela nànkù, dilòlòlò edi, bwalu Ebèlù 13.8 ùdì wàmba nè Yèyè ùdì umwèumwè awu.

¹³⁴ Dìbà adi cyàkenzàbo ncinyi? Bààkabiìsha Yesù. “Ndaayi nùkabiìshe Yesù. Mubiìshaayi, Musòkaayi mu cyalu!” Yèyè ùdì ùbìikidiibwa ànu bipeepèle menemene. Bàkaavwa bamòne, bamòne bintu bùngì cyanaàna bìvwa Nzambi mwènzè, nè—nè—nè Méyi awu miikàle àMushindika. Ke mutùdì naabi pèètù. Kàdì kabìvwa bikolè bwà kuMusòka bwà kuditwa mu cyenzedi to.

¹³⁵ BààkaMubiìsha, nè kwamba nè: “Nudikù... kwèna Wèwè ucyùka nè tudi tubùtuka anyi?”

Wèwè udi wamba nè: “Mmunyi mutùdiku mwà kwikala batwishiibwe bwà cyòci eci? Tudikù mwà kucijaadika anyi?”

¹³⁶ Yone 14.12, Yesù wàkamba nè: “Ewu udi ungiitabuuja Mémè, byenzedi bìNdì ngèza yèyè neàbyènzè pèndè.” Aci’s mmwòmò menemene. Diitabuuja dyètù ndidì dítwàla Kilistò mu bwikadi bwètù.

¹³⁷ Mmwâmbè mu—mu Luukà, nshapità wa 17 nè: “Mu matùkù à ndekeelu piikalà Mwànà wa muntu munkaci mwà kubuuludiibwa, ncifwànyine kwikala cikondo bu Sodomà nè Gomòlà.” Tudi tumòna aci cyènzeka.

¹³⁸ Yèyè wàkamba, kumpàlà kwà cikondo aci kwenzekaci, mu Maalàki 4, nè: “Kùvwa mwà kwikala Mukenji kampàndà wùpàtuka uvwa mwà kwalujulula bantu ku Diitabuuja dyà ku cibangidilu dyàkafidiibwà kùdì bantu musangu wùmwèpelè cyendèleèle.” Misangu yònsò n’ndongamu wa Nzambi bwà kwenza nànkù. Nè pashiìshe beena lwonji nebìikalè butù, nè baakàne bàvwa mwà kubàdyata ku makàsà àbò.

¹³⁹ Tudi tumòna byònsò ebi bilaya. Yèyè mmukwindile mpindyewu mene, wèwè, wèwè, muntu nè muntu wa kunùdì, bwà kuMusòka mu cyalu. KuMusòka mu cyalu’s! Ke kùdìYe muswè kwikala, musòkiibwe mu cyalu bwà cyenzedi. Mònaayi,

panùdì nuMusòka mu cyalu, pa nànkù tudì bafwànyìne kwamba nè: “TùMubiishàayi,” dībà adi, kuMubiikila bwà kushindika Dīyì Dyèndè nè—nè cintu cyàkalayàYe bwà kwenza aci, mùshindù wùvwaYe mwà. . . utùvwa mwà kumanya, mu dibuulula dyà Yesù Kilistò mu matùkù à ndekeelu, nebiikalè ànu mwàkadibì mu matùkù à Sodomà. Yèyè wàkalaya Èkèleeziyà dibuulula adi, pàvwaYe mwà kubuuludiibwa. Pa nànkù kwèdikù mpatà nè kuciina to, Yèyè ùdi umwèumwè awu makèèlèlè, leelù, too nè kashidi.

140 Ngákumvwa muntu mukàjì kampàndà, musangu kampàndà, pàmvwa ngàakula bwèndè Yèyè mwikàle munène menemene. Yèyè kwamba nè: “Kùdi cintu cìmwèpelè cìndì mbèngangana naaci ku dilongesha dyèbè, Mukalenge Branham.”

141 Mèmè nè: “Èè, twasàkidila, bu wèwè nè cintu ànu cìmwèpelè.” Mèmè nè: “Ndi—ndi ntèkemena nè Nzambì ùdi ùcìpeta ànu mùshindù awu.” Ke yèyè nè: “Èè, wèwè’s udi utàmba kutwà Yesù makùmbù be.”

142 Mèmè nè: “Ndi ntèkemena nè ke cintu cìmwèpelè cìdìbo bàmbanda naaci.” Ke—ke mèmè kwamba nè: “Ncyèna m’Mutùmbisha bikùmbàne to.”

143 Yèyè nè: “Kaa, èyowà’s, s’ke cyùdì wenza.” Yèyè nè: “Udi uMuvwija Nzambì.” Ùvwa mmukàjì uvwa kàyi mwitàbùuje nè Yesù ùvwa Nzambì to. Ùvwa mwena Science Chrétienne. Ke yèyè nè: “Udi uMuvwija—udi uMuvwija Nzambì, uMuvwija Nzambì.”

144 Mèmè nè: “Ùdi anyì Nzambì, anyì museeswishi mutàmbe bunène ukààdikù bàà pa buloba bamanyè.” Mèmè nè: “Yèyè. . .”

145 Yèyè nè: “Èè, mèmè’s ndi mwà kukujaadikila, ku Bible webè nè, Yèyè kàvwa nànkù to. Ùvwa ànu mupròfetà cyanààna.”

Mèmè kwamba nè: “Yèyè ùvwa mupròfetà, cyà bushùwà, kàdi Ùvwa Nzambì, kàbìdì.”

Yèyè nè: “Yèyè’s uvwa muntu nè Ùvwa wa cifwàkà.”

Mèmè nè: “Aci’s ncilelèlè, kàbìdì.”

146 Yèyè nè: “Mu njila wènda ùpweka bwà kujuula Lazàrò mu lukità, Yone Munsantu nshapità wa 11, mmwàmbè, Bible mmwambè nè: ‘Yesù wàkadila mwadi.’”

Mèmè nè: “Aci’s ncilelèlè.”

147 Yèyè nè: “Èè, aci’s cìdì cìjaadika nè Yèyè kàvwa mwà kwikala Nzambì, kàdi ùdila mwadi to.”

148 Mèmè kwamba nè: “Kaa, ekèlekèle, inābànzà, aci ke dyèbè didibingisha adi anyi?” Mèmè nè: “Adi’s ke ditèkètè dìdiku.” Yèyè nè. . . Mèmè nè: “Bulelèlè, Yèyè ùvwa Muntu pàakadilàYe mwadi apu; kàdi pàakanyungishàYe mubidi Wèndè mukesè awu, kukòkayè makaaya Èndè makesè awu paanyimà kwamba nè: ‘Lazàrò, pàtukà,’ nè muntu uvwa mufwè kùkaavwa matùkù ànaayi awu, nè wùvwa munkaci mwà kubola mu lukità,

kwimanayè cyàkàbìdì nè kwikalayè nè mwoyi, awu's ùvwa mutàmbe nè muntu, ùvwa Nzambi."

¹⁴⁹ Yèyè's ùvwa muntu, pambèlu apa mu bwâtù ebu dilòòlò adi, pàvwàYe ùsanganyibwa pa mbû apu, mùvwà démons binunu dikùmi yà mu mbû midicìpe nè yìvwa mwà kuMutùkija. Kaabwâtù kakesè kàà kale aku kàvwa kàdikùpa bu mùdì cijikù cyà mùlàngì pambèlu pààpa pa mbû mutuuta kùdì cipeepèlè cicolè awu. Yèyè ùvwa muntu, mucyòke, mulààle. Kàdi pààkaMubiishàbo nè kuMusòka mu cyalu, Wàkatèeka dikàsà dimwè pa mubàngubangu wà bwâtù apu nè kubàndisha mèsù muulu, ke yèyè nè: "Ditalala, pùwayi," nè bipeepèlè nè mavwala kuMutùmikilabi. Awu's ùvwa mutàmbe nè muntu. Awu's ùvwa n'Nzambi.

¹⁵⁰ Ùvwa muntu pàakatùùlukàYe ku mukùnà apu, mwikàle nè nzala, mutàngile ku mucì bwà kupeta cintu kampàndà cyà kudyà. Ùvwa muntu pàvwàYe nè nzala. Kàdi pààkangatàYe màmpà àtaanu nè mishipa yibìdì, nè kudiisha bantu binunu bitaanu, awu's ùvwa mutàmbe nè muntu. Awu's ùvwa n'Nzambi mu muntu awu.

¹⁵¹ Muntu yònsò ukààdikù mufùdishe bwà kwenza cintu kampàndà, ùvwa mmuntu udi witabuujà aci. Cyà bushùwà. Beedi bàà tusàlà nè bakwàbò bàvwa biitàbùùje aci, nè Nzambi ùvwa munda mwà Kilistò, Ùpungishangana nè bàà pa buloba.

¹⁵² Nènkù mpindyewu Kilistò ùdi mu Èkèleeziyà, ùpungisha bantu nè Nzambi. Yèyè ngwàkalaya bwà kucyènza. Bààkafùnda, nè: "Yèyè ùdi umwèumwè awu makèèlèlè, leelù, too nè kashidi." Nudi nwitabuujà nànkù anyi? Ndi nciitabuujà nè mwoyi wànyì wònsò nè, Yèyè ùdi ànu mwindile mpindyewu bwà kusòkiibwa mu cyalu. Mpindyewu cintu cimwèpelè cidì mwà kuMusòka mu cyalu, ncyà twètù kuMubiisha mu twètù biinè, kuMusòka mu cyalu.

¹⁵³ Yèyè nguvwa dipà ditàmbe bunène dikaadiku Nzambi mupèeshe bàà pa buloba. "Nzambi wàkatàmba kunanga bàà pa buloba mu mùshindù wà nè Wàkafila Mwan'Èndè umwèpelè mulela; ewu yònsò udi uMwitabuujà kààkubùtuka to; ùdi nè Mwoyi wà Cyendèlèlè." Tàngilàayi Nzambi nè dipà Dyèndè. Mpindyewu, bantu bààkakwàta mudimu nè dipà dyà Nzambi.

¹⁵⁴ Mukàjì mutekète, musangu kampàndà, ùvwa mwitabùùje aci, nè Yèyè ùvwa dimwèneshiibwa dyà Nzambi mu mubidi. Ke yèyè nè: "Mèmè mulengè civwàlù Cyèndè, nè—nè—nèngòndopiibwè."

¹⁵⁵ Mpindyewu, kulengayè civwàlù Cyèndè. Ke Yèyè kukùdimuka, nè kwamba nè: "WàNdengi awu nganyì? Nwamònu's, bukolè, dikàndà, mbupàtùke mu Mèmè." Yèyè wàkalenge civwàlù Cyèndè. Awu ùvwa nyèyè ùkwàta mudimu nè dipà dyà Nzambi. Nwamònu anyi? KuteketaYè ku cyôci aci.

Kàdi pààkuumukàYe mu nzùbu wa Lazàrô . . .

156 Vùlukàayi nè, Yone Munsantu 5.19, Yesù wàkamba nè: “Bulelèlà, bulelèlà, Ndi nnwàmbila nè, Mwànà kèna mwà kwenza cintu nànsha cimwè mu Yèyè mwinè to, ànu cidiYe ùmòna Taatù wènza aci.” Vùlukàayi nè, Yesù Kilistò kààkenzakù cishimà nànsha cimwè to, kààkenzakù cintu nànsha cimwè cyà citàmbe-mfùkulu to, ànu pàvwàYe dyàmbedi ùmòna cikèènà-kumòna pa cyà dyenza. Mbanganyi bàdi biitabuuja nè aci mbulelèlà? Yone Munsantu 5: “Bulelèlà, kî Ncîndi ngumvwa to, kî ncidi muntu kampàndà ùNgambila to; Cîndi mmòna Taatù wènza aci, ke cidi Mwànà wènza byà mwomùmwe.” Mpindyewu byòbì kabiyi nànkù to, díbà adi Mifùndu mikwàbò kayèna nànkù to. “Bulelèlà, bulelèlà, Ndi nnwàmbila nè, Mwànà kèna mwà kwenza cintu nànsha cimwè mu Yèyè mwinè to; kàdi ànu cidiYe ùmòna Taatù wènza aci, ke cidi Mwànà wènza. Taatù ùdi ùkwàta mudimu, nè Mémè ndi ngùkwàta too nè mpindyewu.” Mu ngaakwilù mukwàbò nè, Yèyè ùvwa wènza ànu, wènza cívwa Nzambi ùMwambila bwà kwenza aci.

157 Mpindyewu, vùlukàayi nè, pààkuumukàYe ku nzùbu wa Lazàrò, Yèyè ùkaavwa muyè matùkù mulongolongo. Lazàrò kusaamayè, nènku kuMutùminabò mukenji. Kàakaya to. Paanyimà pàà matùkù àbidi, Lazàrò kusaamayè bikolè. Ki kuMutùminabò kàbidi mukenji, Yèyè kàvwa ànu mwànji kuya to. Pashiishe pàvwà cikondo cikumbàne cilwà, cívwa Taatù muMuleejè nè cívwa mwà kwenzeka, Lazàrò wàkafwà. Ke Yèyè kukudimuka, pààkafwà Lazàrò, kwamba nè: “Lazàrò mmufwè, nè ndi nè disànkà bwà bwalu bwènù nwènù Mùmvwa nciyipu to.” Bávwa mwà kwikala bàjinga bwà Yèyè kumusambidila, nè bikwàbò. Yèyè wàkenza ànu cívwa Nzambi muMwambile bwà kwenza aci, cívwaYe mumòne aci, cikèènà-kumòna. Nwamònu’s, Yèyè’s ùkaavwa mumòne cikèènà-kumòna pa cyà dyenza. “Kàdi Ndi nya kamubiisha.” Hum! Ki bwalu mbwòbù abu’s.

158 Tàngilàayi Martà ùlwa bwà kuMumònà. Yèyè nè: “Mukalenge, bu Wèwè mwikàle mwaba ewu, nùnkù mwanèètù wa balùme kî mmufwè to. Kàdi nànsha mpindyewu, cyònsò cyùdi Wèwè ulòmba Nzambi aci, Nzambi neàKupèeshèci.” Nwamònu anyi?

159 Ùvwa mumanyè cívwaYe nè cyà kwenza. Mutàngilàayi ku lukità lwà Lazàrò. KwambaYè nè: “Taatù, Ndi nKusàkidila, bwalu Wèwè ukàadi mumane kuNtèeleja, kàdi Ndi ànu mucyàmbe bwà aba bàdi biimàne mwab’ewu aba.”

160 “Lazàrò, pàtukà!” Nè Lazàrò kubìika ku bafwè.

161 Mpindyewu, kacya Yèyè kàakambakù cintu nànsha cimwè bwà dicyòka mwaba awu nànsha. Awu ùvwa n’Nzambi ùkwàta mudimu nè dipà Dyèndè. Kàdi pàdi bantu bàkwàta mudimu nè dipà dyà Nzambi bìvwa bishùllàngàne.

162 Bwalu, Yèyè ùvwa Díyi. “Nè Díyi nditwè kutàmba mwelè wà mvità wà nseke yibidi,” mùdi Bible wàmba, “nè didi dijingulula

meeji nè mapàngadika à mu mwoyi.” Aci cidi cijaadika nè Nzambi ùdi munkaci mwà bantu. Èyowà. Tùciitàbùùjaayi. Yèyè ùkaadi mudìlongòlòle, bilondèshile Dîyi Dyèndè, bwà kusòkiibwa mu cyalu, dilòlòlò edi.

¹⁶³ Mbanganyi bàdi kaaba aka bàsaama nè biikàle mu lukèngelu, elàayi byanza byènu muulu. Tùmonàayibi byanza byènu, mbanganyi bàdi bàsaama nè biikàle mu lukèngelu, mwaba kanà wònsò. Èè, cintu cimwèpelè cidiYe mwindile ncyà kusòkiibwa mu cyalu. Mulombaayi ànu cyanààna.

¹⁶⁴ Mpindyewu ambàbi tǔng bu nè Yèyè ùvwa mwimàne kaaba aka nè nkooci uvwaYè mumpèeshe ewu, nè wèwè kulwa kumpàlà Kwèndè nè kwamba nè: “Mukalenge Yesù, ndi muswè bwà Wèwè kungondopa,” udi mumanyè cidiYe mufwànyine kwamba anyi? “Nkàadi mumanè kucyèenza.”

¹⁶⁵ “Wàkatàpiibwa mpùtā bwà kushipa kwètù kwà mikenji; ku mibùndābùndā Yèndè twākondopiibwa.” Kèna mwà kucyèenza musangu mwibìdi to. Pa nànkū, nwamònu’s, Yèyè ùkaadi mumanè kucyèenza. Bikèngela ùcītābùùjè. Kakwèna cintu nànsha cimwè cyùdi mwà kwenza to, kukùmbanyina cintu kanà cyònsò, bwà—bwà kupeta lupàndù lwèbè anyi dyondopiibwa. Kakwèna cintu nànsha cimwè cyùdi mwà kwenza pa bwalu abu to. Ndipà dyà kùdi Nzambi dyà cyanààna. Nwamònu’s, nngàsà, dipà dyà ku bitupù. Mémè mukupèeshe mùliyò wà ndola nè wèwè mwolòle kàlāv wandā kàànyì; ncivwa mukupèesheyi to; wèwè udi mucyenzèle cintu kampàndā. Nwamònu anyi? Dipà dyà Nzambi didi ku bitupù. Cintu cimwèpelè cidi cikèngela bwà wèwè kwenza nkudìitabuuja, nè Yèyè wàkakupetela cyòci eci, wèwè. Yèyè. . . Cikaadi cimana kupikula. Yèyè wàkakwenzelaci. Nè kakwènakù muntu pa buloba apa . . .

¹⁶⁶ Ncyèna mumanyè cinùvwa naaci mu Baton Rouge emu to. Bintu byònsò bìdi munkaci mwà kulaluka mu ditùnga, ditentula nè ciinè aci. Tudi bamanyè nè bìdi nè cyà kwikala ànu mùshindù awu. Kàdi pàdi muntu ùbwela ùkwambila mùdiye nè bukolè bwà kukwondopa, ùdi ùshima. Nzambi nkààyèndè ngudi mwà kwondopa. “Mémè ndi Mukalenge Nzambi webè udi wondopa màsaamā èbè ònsò.” Yèyè kààdyàkwabanyanganakù butùmbi Bwèndè nè muntu nànsha umwe to. Kakwèna muntu nànsha umwe udi nè bukolè bwà kwondopa to.

¹⁶⁷ Kàdi kùdi bantu bàdi nè mapà bwà kumwènesha Nzambi. Mpaasàtā wenù [Mwanèètù Branham ùdi ùkòsola—Muf.] (Mfwilaayikù luse.), yèyè ùdi mwà kwangata Nzambi, ku dipà dyà—dyà mulongeshi, ùdi mwà kuumvwija Dîyi mu mùshindù wà nè udi mwenzèjilbwe bwà kuDimòna. Wèwè mwikale nè mèsù à kumòna naawù, nèucimòne. Kùdi mukwàbò, pàmwāpa dǐngā dipà. Kàdi kùtu misangu yònsò ànu dipà didi dìmweneshà Bwikadi bwà Nzambi, nè, ku dyòdi adi, bikèngela ùdītābùùjè wèwè mwine.

168 Ngènzàmpèkààtù mmufwànyine kulwa ku cyoshelu eku bu nsongàalùmé anyi nsongàakàji, mwikàle nè bidimu dikùmi nè binaayi, nè mbafwànyine kukutwàdila byàkudyà byèbè mwab'ewu, nè udi mufwànyine kwela mbilà kùdì Mukalenge, too nè muwikala nè bidimu makùmi citèemà, kwèna mufwànyine kusungidiibwa to. Kàdi bidi bikèngela bwà wèwè kwitaba dyàmbedi cidiYe mukwenzèle. Nwamònu anyi? Bikèngela ùcitàbè, wèwè mwinè. Dìbà adi paùdì uciitaba, dìbà adi Yèyè ùdi Mwakwidi Munène, mutwàngaji, bwà kukwakwila pa dijikula dyèbè dyà byùdi witabuuja.

169 Mpindyewu ncintu cìmwècìmwè aci ku dipà mùshindù ewu. Nkupàtula meeji èbè mu wèwè, nè dìbà adi umòna cidiYe wàmba bwà kwenza aci.

170 Ndi mmòna bantu bàlwa pa cibumbà cyà ku cyambilu, bàtùpika bàya muulu bàalukila nè bèèla mbilà mikolè, nè bamba nè: “Kaa, Mwanèètù Branham, mèmè's ndi nè diitabuuja dyònsò pa buloba.” Cyùdi wenza apa ncinyi, dìbà adi? Nwamònu anyi? Aci's—aci's ndisaluka, kàdi kí ndiitabuuja to.

171 Diitabuuja dishùwashùwâlè kaditu dimanyè dicimunyiibwa to. Dikaadi dimane kwenjiibwa. Dikaadi dimane kujika. Nzambi ngudi mwambe nànkù, nè aci cidi cìcìjikija, nudi numòna's. “Nzambi ngudi mwambè nànkù!” Mpindyewu ncintu cìmwècìmwè aci, dìbà kanà dyònsò. Paùdì uciitabuuja cyà bushùwà, cidi cìMulenga.

172 Mpindyewu mukàji mukesè wàkalenga civwàlù Cyèndè awu, yèyè nè: “Mèmè ànu mulengè civwàlù Cyèndè cyanààna, nèngòndopiibwè,” nè wàkacyèenza. Nènku pààkenzàye civwà diitabuuja dyèndè diswè bwà kwenzayè aci: “kucilenga,” Yèyè kucyùmva, nwamònu's, ke Yèyè kukùdimuka nè kwakula nendè.

173 Mpindyewu, Yèyè ùdi umwèumwè awu makèèlèlè, leelù, too nè kashidi. Bu wèwè ànu mwà kwitabuuja Kilistò, itàbùùjà! Lekèlè diitabuuja dyèbè dilengè civwàlù Cyèndè. Nènku Yèyè, mpindyewu mene, m'Mwakwidi Munène udi mwà kulengiibwa kùdì dyumvwa dyètù dyà mateketa. Twètù bònsò tudi bamanyè aci. Nènku pìikalàYe umwèumwè awu makèèlèlè, leelù, too nè kashidi, nebikengelè bwà Yèyè kwenza maalu leelù ewu mwàkenzàYe makèèlèlè amu pìikalàbi nè Yèyè ùdi Mwakwidi Munène umwèumwè awu. Mpindyewu kanwènaayikù baswè kuciitabuuja anyi? Ikàlaayi ànu nè diitabuuja mu Nzambi.

174 Pìikalàbi nè ndi munwàmbile mashimi, dìbà adi Nzambi kàakucitwa nyama ku mikòlò to. Kàdi mèmè munwàmbile Bulelèlè, Yèyè—Yèyè nèCitwè nyama ku mikòlò. Yèyè mmwenzèjiibwe bwà kutwà Bulelèlè nyama ku mikòlò.

175 Yesù wàkamba nè: “Ndi nè bujaadiki.” Nè bujaadiki abu n'Diyi dyà Nzambi, mu bushùwà bwà bwalu. Yèyè nè: “Mwaba awu Mifundu's yidi yimfidila Mèmè bujaadiki. Pìikalàyi kayiyi

yìMfidila bujaadiki to, dîbà adi kanucîtabùùjì to.” Nwamònu anyì?

¹⁷⁶ Nèngu pìikalà Mifundu kayìyì yìjaadika cîndì mèmè nnwàmbila mpindyewu eci to, nè: “Yèyè ùdi umwèumwè awu makèèlèlè, leelù, too nè kashidi,” dîbà adi kanwìtabuujikù Mufundu to. Bwalu, Mifundu mmyàmbè nè ke cìvwàYe, nè Yèyè wàkalaya bintu ebi bwà cikondo cyà ndekeelu eci. Vùlukààyi nè, ànu ku ndekeelu menemene kwà cikondo cyà beena Yudà, ke mùdìYe ùDibuulula, Maasiyà. Ndekeelu wa cì—cikondo cyà beena Sàmaalèyà, Yèyè wàkenza cintu cìmwècìmwè aci. Mpindyewu’s n’ndekeelu wa cikondo cyà bàà Bisàmbà byà bendè. Yèyè ùdi umwèumwè awu makèèlèlè, leelù, too nè kashidi.

¹⁷⁷ ÛMutàbùlùjè mu kondò kèèbè kàà mwoyi, ùMusòkè mu cyalu, patùdì twinyika mitù yètù apa.

¹⁷⁸ Taatù wa mu Dyulu, ànu Dìyì dimwè cyanààna dyà Kùdì mpindyewu nediikalè dikùmbàne mu byònsò, Cyôci aci ke citùdì bònsò naaci dijinga, ànu Dìyì dyà Kùdì. Swàkù bwà bantu bùmvwèku bitòòke tòò cìdì cyenzedi cyà bulobo, citùdì tuteeta kwenza, Mukalenge, mbwà—mbwà kubàfikisha ku dipeta dyàkalenga dyà kùdì Mukalenge Yesù ùdìbo banangè nè bàkwàcila mudimu awu, swàkù bwà bàcyènzè dilòòlò edi, Mukalenge, bwalu lufù Lwèbè kalùvwa mu cijèngù to, Wèwè “wàkatàpiibwa mpùtà bwà kushipa kwètù kwà mikenji, muzaajìibwe bwà bubì bwètù, dinyooka dyà ditalala dyètù dyàkapòna pambidi Pèndè, nè ku mibùndàbùndà Yèndè twàkondopiibwa.” Ndi ndòmba, Nzambi, bwà muntu nè muntu mwab’ewu, mu Bwikadi bwà Nzambi, ùmwè eci nè àpetè cìkèèna—kumòna, nè neòndopiibwè bwà butùmbì bwà Nzambi. Mu Dìna dyà Yesù Kilistò, ndi ndìleeja mèmè mwinè pàmwè nè disangisha edi, bwà luumù Lwèndè nè butùmbì Bwèndè. Amen.

¹⁷⁹ Mpindyewu ikàlaayi nè kaneemu kàà menemene, ànu bwà tusunsa tukesè cyanààna. Mpindyewu ànu Dìyì dimwè cyanààna dyà kùdìYe nediikalè nè mushinga kutàmba byònsò bìndì mèmè mufwànyine kwamba, anyì cyònsò cìdì muntu mukwàbò kanà yònsò ewu mufwànyine kwamba aci, bwalu Yèyè ngudi ucyènzà. Yèyè ke Yèyè awu. Yèyè m’Mwenji wa maalu, nè tudi batwishiiibwe nè—nè Mukalenge Yesù neànùpèèshè bintu ebi mpindyewu, muntu nè muntu.

¹⁸⁰ Mpindyewu tùmonààyibì nè ndìbà kaayi. Ncìvwa mumanyè nè bìvwa nànkù to. Ndi nnwàmbila, bwà kupàtuka pa dîbà mwab’ewu, citùdì nè cyà kwenza, katwèna nè dîbà dyà kwelesha mulongo ewu to. Tùbiikidilàayi ànu mu batèèleji amu.

¹⁸¹ Mpindyewu twànjàayi kwangata Mufundu, bwà katanci kakesè cyanààna. Mpindyewu Bible ùdi ùlaya, mu ditùkù edi nè, dyambuludiibwa dyà Sodoma nè Gomòlà nebyènzuludiibwè.

Mbanganyi bàdi biitabuuja nanku mpindyewu, elàayi cyanza cyènu muulu? Bible ùdi ùmanyisha cyòci aci mpindyewu.

¹⁸² Nènkù díbà adi aci cívwa ncinyi mu Sodomà nè Gomolà? Cívwa n’Nzambì mu mmwènekeli wa muntu. Nè mùshindù wùvwà Abraham mucimanyè awu, mpààkambàYe nè: “Sarah wàsekì mu ntentà, paanyimà apu bwà cinyi? Anyi, bwà cinyi yèyè wàkeela mpatà nè, Mèyi àkaakulàYe awu kaàvwa nanku?” Yèyè ùvwa mwà kumanya meeji à Sarah, paanyimà Pèndè apu. Mpindyewu mònayyi aci ní kacívwa nanku.

¹⁸³ Mpindyewu, aci kacívwa bwà èkèleeziyà wa Baabùlòònà to, anyi èkèleeziyà wa Sodomà. To, to. Aci kacívwa bwà bantu bàà mu milongo yà cyena màngumba mwàmwa to. To, mukalenge, kacya kacyàkaya kùdibo to. Bààkapeta wabò mùsànjeelà. Nwamònu anyi?

¹⁸⁴ Kàdi nkùdi Èkèleeziyà musungula, Dimiinu dyà kumutù dyà Abraham didi nè cyà kwitabuuja Díyi nànsha maalù àdi ènzekà miikàle bìshi nè: “Abraham wàkabiikila bintu bìvwà kabiyikù abi bu nè bìvwakù.” Nzambì ngudi mwambè nanku, nè Yèyè wàkaciitabuuja. Mpindyewu, mulundà wanyi, ndi—ndi mumanyè nè Nzambi mmuswikiibwe ku Díyi edi, bwà kuDilama.

¹⁸⁵ Mpindyewu ndi muswè bwà nwènu, mwaba wònsò wunùdi nusanganyiiibwa mu nzùbu emu awu, bwà nùsombèku nè kaneemu kàabúngi bwà katanci kakesè cyanàànà, mwaba wònsò wunùdi awu. Nè itàbùùjaayi, itàbùùjaayi ànu nè mwoyi wènu wònsò.

¹⁸⁶ Mpindyewu bu mèmè mwà kukwondopa, bu mèmè mwà kwondopa mwànà mukese wa bakàji udi mwoyi wànyì wùmvwila luse ewu, bu mèmè mwà kwondopa kaacintu kakesè kàdi kalààle mwaba awu aku, mvwa—mvwa—mvwa mufwànyine—mvwa mufwànyine kukalaba kuumukila apa too nè ku Pòle Nord, bu mèmè mwà kwenza nanku, bwà kucyènza, anyi muntu kanà yònsò udi nè njiyà yà buntu. Kàdi ncyènàku mufwànyine kwenza aci kutàmba cintu nànsha cìmwè to. Pàmwápa bàmwè bàà kunùdi kabààkwikala nè mwoyi to ànu bwà katanci kakesè, nè kànsèrè. Bu mèmè mwà kukwondopa, ndi mufwànyine kwikala...Ncyèna mufwànyine kukumbana bwà kwimana pa cibumbà cyà ku cyambilu eci to bu mèmè nè mùshindù wà kucyènza kàdi ncíyi muswè kucyènza to. Mpindyewu, ncyèna mwà kucyènza to. Mwoyi wànyì wùdi wùnùmvwila luse. Mvwa mufwànyine kucyènza bu mèmè nè mùshindù, kàdi ncyèna mwà kucyènza to. Kakwèna muntu mukwàbò nànsha umwe udi mwà kucyènza to. Ncyà bushùwà. Kàdi, nudi numòna’s, Yesù ùkaadi mumanè kucyènza. Nwamònu anyi? Nè Yèyè ùdi ùteeta ànu bwà kukufikisha ku diitabuuja cyòci aci. Kàdi wèwè... .

¹⁸⁷ Ndi ngùmvwila bantu luse. Kùdi bintu búngi cyanàànà bìdi ànu bibàfofòmije, mùshindù *kampàndà* nè mùshindù *kansanga*,

mu mùshindù wà nè, bantu neebè, bu mikòòkò kayìyì mulami to, ànu bu nànkù's. Kí mbamanyè cyà dyenza to. Ewu ùdi wàmba *cikampàndà* nè ewu wàmba *cikansanga*. Kanwèdikù meeji ku cìdì muntu mwámbe to nè: “Matùkù à bishimà àkaadi mamanè kupita. Cintu pààci nè ndibàtiiza dyà Nyumà Mwímpè kacitukù to.”

¹⁸⁸ Nènkù, vùlukàayi nè, Peetèlò wákamba, mu Ditùkù dyà Mpenta nè: “Mulayi wùdi kunùdi nè kùdi bàna bèènú balela, nè kùdi aba bàdi kule, mu búngì bwònsò bwàbiikilà Mukalenge Nzambi wetù abu.” Nwamònu anyi?

¹⁸⁹ Yesù wàkalaya nè bintu ebi nebyènzeke mu matùkù à ndekeelu nè, Nzambi neàpinganè mu mmwènekèlu wa mubidi wà buntu, ànu bu wèwè nè mèmè kaaba aka dilòòlò edi, nè mufwànyine kukwàta mudimu nè cintu cìmwècìmwè aci pabwìpì menemene nè pàvwà buloba mwà kubùtudiibwabù. Nè buloba bùvwa mwà kwikala bu Sodomà. Nwamònu anyi? Mpindyewu tudì nè ngiikàdilù wa Sodomà awu; kaaba nè kaaba kònsò, muntu yònsò, byònsò bitèèka ànu mu byòbi menemene.

¹⁹⁰ Mpindyewu diitabuuja dyètù kadyènakù mwà kufika ku cyòci aci anyi? Katwènakù mwà kuMubiikila bwà àmatè mu cyalu anyi? Mubiikilaayi mu cyalu. Diitabuuja dyènù ke cintu cìmwèpelè cìdì mwà kucyenza. Mpindyewu nudi nwitabuuja nè mwoyi wènú wònsò, muntu nè muntu wa kunùdi mpindyewu.

¹⁹¹ Nènkù ndi muswè kunùkonkakù cintu kampàndà. Kakùyì twartà twà disambila to,...-twabanyina muntu kampàndà mwab'ewu, bu Nyumà Mwímpè munène awu mwà kulwa mwab'ewu, nè ku dilaabiibwa dyèbè wèwè nè dilaabiibwa pambidi pàanyi, nè kumanyisha nè Yesù Kilistò ùdi munkaci mwà kukwàta mudimu munkaci mwètù mùshindù ewu, ncinyi cikwàbò cìdìYe mufwànyine kwenza? Kakwèna mulayi mukwàbò mu Bible, kumutù kwà cyòci aci to. Ke mulayi wà kumutù kwà yònsò ngwòwò awu. Mbanganyi bàdi bamanyè nànkù? Bushùwà's, ncyòci. Cìdì—cìdì cintu cyà ndekeelu bwà cikondo cyà èkèleeziyà.

¹⁹² Beena Yudà, mu cikondo cyà cipungu cyà Dikènga dinène, nènkù pa . . . bàdi nè—nè dikùmbudiibwa díbà adi, kàdi kí nkùdi èkèleeziyà wa bàà Bisàmbà byà bendè to.

¹⁹³ Eci ncintu cyà ndekeelu cilaya bàà Bisàmbà byà bendè. Ncilelèlè. Nwamònu's, bàvwa mbàà Bisàmbà byà bendè mu Sodomà mwàmwa, bàvwa nè cyà kwoshiibwa. Nènkù aci, s'ke—Mukàji-musèla ewu—ewu, uvwa Dimiinu dyà Bukalenge dyà Abraham awu, mwikàle Mukàji-musèla mubiikila bwà kupàtuka munkaci mwà bàà Bisàmbà byà bendè. Ke cimanyinu cyàbò cyà ndekeelu ncyòci aci, cyònsò aci.

¹⁹⁴ Cifùndaayi mu mukàndà wènú amu. Mèmè ndi muntu mununu. Kàdi cifùndaayi ànu cyanààna mu mukàndà wènú amu bwà numòne ní cìdì cyènzeka, anyi to. Nwamònu's, wèwè udi

ku ndekeelu mpindyewu. Dîbà kaayi? Ncyêna mumanyè to. Ndi muMwindile leelù ewu. Yêyè kàyi mulwè leelù ewu to, nêngiikalè muMwindile mààlabà. Yêyè kàyi mulwè mààlabà to, nêngiikalè mwindile ditùkù dîdî dilondà. Yêyè kàyi mulwè cidimu eci to, nêngiikalè muMwindile cidimu cîdî cilondà. Ndi mumanyè nè Yêyè ùlwalwa. Ncyêna mumanyè kasunsa anyi dîbà to, kàdi ndi mumanyè nè byònsò mbyùle, bilongolola bwà Dyambwibwa. Èkèleeziyà ùdî ùbîikidiibwa bwà kupâtuka. Neciikalè diya dyà mu musokoko; ànu dijîmina, nènku ke cyònsò ciikalàku aci.

¹⁹⁵ Nè bàà pa buloba bàtùngunuka ànu mwàbù nè kale, bantu bàyiisha, nè bantu bèèla meeji nè bàdi bàsùngidiibwa, ànu menemene mwàkenzabo mu matùkù à Noà, nè bikwàbò. Noà wàkabwela mu bwâtù, nè bantu bààkatùngunuka ànu nànkù, nè buloba munkaci mwà kunyùnguluka ànu mùshindù wùmwèwùmwè awu. Anji elàayibi meeji ku bwalu abu! Kàdi, bajîmine Cyendèlèlèlè, bèèla meeji nè mbasùngidiibwe.

¹⁹⁶ Dimwè dyà ku matùkù aa nêngiikalè mwà kutwàla ntentà munène mu ditùnga edi, nè kumwasa, bwà twamòna mwà kwenza masangisha à mu mapingaja, nè dileeja dyà njila, bwà nwamòna mwà kuumvwa maalù aa bìmpè. Kukùngwija bàna bèètù bònsò pàmwè bwà twamòna mwà kwenza masangisha.

¹⁹⁷ Mpindyewu bu Yesù Kilistò mwà kuuja mulayi Wèndè, dîbà adi tudî benzèjiibwe bwà kuMwitabuujà. Ndi muswè bwà nwènù bònsò, muntu nè muntu wa kunùdî, bwà kwikala ànu nè diitabuujà dipwekèle bu dyà bàna, bwà kuMwitabuujà.

¹⁹⁸ Mpindyewu panùdî ànu nubanga nè mitù yènù miinyika apu, nè nubanga kusambila, nwamba nè: “Mukalenge Yesù, mpindyewu ndi mumanyè nè muntu ewu kî mmummanyè to. Kàdi pàanyì ndi mu lukèngelu. Nè mbatwàmbile nè Wèwè udi Mwakwidi Munène udi mwà kulengiibwa kùdî dyumvwa dyà mateketa ètù. Bu Wèwè ànu mwà kumulekela. . . Bu mèmè mwà kuKulenga, akwilà ànu mu yêyè amu, Mukalenge, bwà mèmè, ngaamòna mwà kumanya dyèndè. . . kumanya nè ng’Wèwè. Ndi mumanyè nè yêyè kî mmummanyè to.”

¹⁹⁹ Nè aci’s mmu batèèleji amu, ànu batèèleji basambàkàne; bàà diitabuujà, beena bupidyà, bàà diitabuujà dyà budìngibudìngi; bangènzàmpèkààtù, bansantu, nè bònsò pàmwè.

²⁰⁰ Mpindyewu nudi nè cyà kwitabuujà. Mpindyewu bu Yêyè mwà kwenza eci mu batèèleji emu, ndi muswè bwà yònsò wa kunùdî mwab’ewu, àmbè nè: “Mwanèètù Branham, ndi—ndi mumanyè nè bìdî—bìdî nè cyà kwikala Yêyè udi utàngila disangisha mwàkenzàYe musangu awu amu.” Ndi muswè bwà wèwè, bu wèwè mwà kwitabuujà cyà bushùwà, ndi muswè bwà wèwè kwela cyanza cyèbè muulu, àmbà nè: “Mukalenge, nèncitabè nè mwoyi wànyì wònsò nè, ndi ngiitabuujà nè n’Kilistò Yesù, bilondèshile mulayi Wèndè.” Mu nzùbu mujimà emu. Nzambi ànùbènèshè. Abi’s mbìmpè. Kaa, mbibi bitàmbe mutùdî

katùyì nè ngondo mujimà wa kwikala mwab'ewu's. Nwamònu's, lekèlaayi ànu... Ndi mwenyi kunùdi. Nwamònu's, mbikolè. Nwènu tòngunukàayi ànu nè kwitabuuja.

²⁰¹ Mpindyewu, m'Bukènkè kampàndà. Nzambi ùdi Bukènkè, tudi bamanyè aci, Dikunji dyà Kapyà. Nènkù mpindyewu sambilaayi ànu cyanààna nè nùBùlengè, nè Mukalenge Yesù àndamunèku.

²⁰² Mpindyewu ndi ngàngata nyumà yònsò udi munda emu ku bukòntononyi bwànyì mèmè, mu Dîna dyà Yesù Kilistò, bwà bùtumbi Bwèndè. Mpindyewu ikalaayi nè kaneemu kàà menemene. Sambilaayi. Ikàlaayi nè kaneemu kàà menemene.

²⁰³ Mpindyewu, s'ki Cyôci eci. Kùdi inàbànzà ànu mwab'ewu kumpàlà kwànyì eku. Ùdi nè mutù wèndè mwinyika, nè ùdi ùsambidila lutàtù lwèndè yèyè mwinè. Bu wèwè muswè kubàndisha mutù wèbè mpindyewu, nyèyè ewu ànu mumpàlà mwànyì. Udi witabuuja nè mwoyi wèbè wònsò anyi? Udi witabuuja nè Nzambi ùdi mwà kwondopa disaamà dyà nsùkaadi adi nè kukusàngaja anyi? Mpindyewu, ke cyùdi naaci aci, disaamà dyà nsùkaadi. Ncyèna mukumanyè to. Wèwè udi mwenyi ànu wa menemene ewu kùndi. Kàdi udi witabuuja nè mèmè ndi musadidi Wèndè anyi? Patwikalà—patwikalà beenyi muntu nè mukwèndè, ela cyanza muulu, mùshindù awu, bwà bantu bàmonè. Nwamònu anyi? Èyo. Nwamònu's, ke inàbànzà nyèyè ewu. Nènkù mpindyewu ùdi ùsaama disaamà dyà nsùkaadi. Nènkù udi witabuuja nè Nzambi ùdi mwà kungambila nè wèwè udi nganyì anyi? Ncifwànyine kukufikisha ku diitabuuja anyi? Udi Màndàmù Martin. Aci ní ncyà bushùwà, elà cyanza cyèbè muulu. Nwamònu anyi? Ikàlà wèwè ànu nè diitabuuja. Kwèdi mpatà to. Ikàlà nè diitabuuja.

²⁰⁴ Mpindyewu cidiye mulenge ncinyi? Ndi muswè kukonka batèèleji. Cidiye mulenge ncinyi? Ki mukàji wàwa nè cyanza cyèndè cyà dyàbalùme cyela muulu, nè cyànyì, pààci, kumpàlà kwà Nzambi. Nwamònu anyi? Mmulengè Cintu kampàndà. Ànu mukàji mukesè wetù wa pàtupù ewu, mu bushùwà bwà bwalu, bwà kunwàmbila bulelèlè, mpindyewu mònaayi eci ní mbulelèlè, mbimushitùle. Kàvwa mumanyè nè ùvwa nè diitabuuja bùngì abu to. Diitabuuja kí ncintu kampàndà cyùdi ukwàtakaja to; ncintu kampàndà cyùdi naaci. Nwamònu anyi? Ùvwa mushitùke. Nànsha mene mpindyewu mukàji awu mmudyumvwe bishiilàngàne nè mwàkadiye kùkaadi tusunsa tukesè. Yèyè's mmumanyè nè cintu kampàndà ncimwenzèkèle.

²⁰⁵ Mwab'ewu, kanwènaayikù numòna Bukènkè abu anyi? Cyà bushùwà. Nudi nuBùmòna ànu mwaba ewu pa mukàji udi apa ewu, lwà paanyimà apa mene anyi? Ùdi ùsaama... Ùdi nè mutù wèndè mwinyika. Ùdi munkaci mwà kusambila. Kàdi ùdi ùsaama nyimà wèndè awu. Bu yèyè mwà kwitabuuja nè mwoyi

wèndè wònsò, ùdi mwà kwondopiibwa ku disaamà dyà nyimà adi. Bushùwà's.

206 Yèyè neàcipangile, cyà bushùwà ànu mùdi cintu kanà cyònsò eci amu. Nwamònu's, disambila dyèndè dicidei ànu dyènda ditungunuka. Mukalenge, nkwàcishèku. Màndàmù DeVille, ng'wèwè's. Ke ngàsà nyèyè awu. Mukàjì awu ùvwa munkaci mwà kusambila, kàvwa nànsha wèla meeji, kèna nànsha ùmvwa cintu nànsha cimwè cindi ngàmbe eci to. Mpindyewu mukonkàayi ní mmummanyè. Ke cidiye aci, nè ke lutàtù lwèndè ndwòlò alu.

207 Pa nànkù ncinyi cidiye mulenge aci? Ke dishindika dyà Yesù Kilistò ndyòdi adi, Dìyì adi, dijingulula meeji àdi mu mwoyi.

208 Nudi nwitabuuja anyi? Ikàlaayi ànu nè diitabuuja. Sambilaayi, mwaba kanà wònsò. Itàbùùjaayi ànu cyanàànà. Ke cyònsò cidi cikèngela bwà nwènù kwenza. Kwitabuuja ànu cyanaana, kwitabuuja ànu nè ndi munwàmbile Bulelèlà. Mpindyewu, mèmè ncyèna Yèyè to. Mèmè ndi ànu musadidi Wendè cyanàànà, ànu musadidi Wendè cyanàànà.

209 Bu wèwè ànu mwà kwikala nè diitabuuja búngi bukùmbàne! Ncyèna mwà kumutèèla to. Ndi mumanyè cidi lutàtù lwèndè, kàdi, nwamònu's, anjì indilaayi ànu katanci nènku pàmwàpa nebishintulukè. Bulelèlà kí mbyà kabiye mwà kwenzeka to, kàdi bikèngela ùmukè mu cipidi aci. Kèna mwà kudìitabijila yèyè mwinè to. Bikèngela kumwitabuujiila.

210 Inàbànzà kampàndà ùdi ùsaama disaamà dyà twonyi. Kí ngwa múnwemu to. Ngwà ku Mississippi. Yèyè mwitabùùje nè mwoyi wèndè wònsò, Nzambi neòndopè disaamà dyà twonyi adi. Màndàmù Palmer, bu wèwè mwà kwitabuuja nè mwoyi wèbè wònsò, udi mwà kwondopiibwa ku cyòci aci. Cyàkuumùku. Cyàndàmùki Bukènkè pambidi pèndè. Cyàmanyi kuumuka kùdiye. Ikàlà nè diitabuuja kùdi Nzambi. Kwèdi mpatà to.

211 Kùdi inàbànzà kampàndà musòmbe ànu ku luseke lwèndè aku. Ùdi ùsaama binyòka. Udi witabuuja nè mèmè ndi mupròfetà wa Nzambi anyi, inàbànzà? Udi witabuuja anyi? Udi witabuuja bu Nzambi mwà kungambila nè wèwè udi nganyì, aci necikukwàcishe bwà kwitabuuja anyi? Dìná dyèbè m'Màndàmù Meadow. Udi witabuuja nè mwoyi wèbè wònsò mpindyewu, udi mwà kwondopiibwa, wèwè pèèbè.

212 Aci's ncilàkùshe inàbànzà udi ku luseke lwèndè awu kapyà. Nyèyè awu musòmbe mwaba awu, pèndè. Ke Cyòci aci munkaci mwà kuya, cyènda cipweka nè mulongo. Inàbànzà kampàndà udi musòmbe mwaba awu, ùdi ùsaama... Udi mumulondele awu, ùdi ùsaama disaamà dyà nsùkaadi, disaamà dyà nsùkaadi. Mbaswè bwà kuyayè ku lùpitaadi, kàdi mmubèngè bwà kucyèenza. Ùdi nè mwànà wa balùme udiyè ùsambidila, kàbìdi. Mwànà wa balùme awu kèna kaaba aka to, kàdi udi witabuuja nè Nzambi ùdi mwà kungambila cidi citàcishà mwànà wa balùme awu anyi? Udi nè disaamà dyà mwoyi. Itàbùùjè, nè Yèyè

neàkwondòpè. Udi witabuuja nè Nzambi ùdi mwà kungambila nè wêwè udi nganyì anyì? Mandamù Dufflee, D-u, f yibìdì, l, e yibìdì. Byenze bu... Ncyà bushùwà. Ncyà bushùwà anyì, elà cyanza cyèbè muulu, nè byanza byèbè byela muulu. Èyo. Mpindyewu udi witabuuja, nènku udi mwà kusàngajiibwa, wêwè pèèbè.

²¹³ Nudi nwitabuuja nè ncintu cìmwècìmwè aci cìdì... Nudi nwitabuuja nè Bwikadi bwà Yesù Kilistò bùdi kaaba aka mpindyewu anyì? Mbanganyì bàdì biitaba aci? Kaa, dikùbiibwa kaayì's wè! Dikùbiibwa kaayì's wè!

²¹⁴ Nwamònu's, cinùdì benzè ncinyì? Nudi baMubiishe. Nudi baMubweje mu cyalu. S'ki Yêyè ewu mu cyalu. Mpindyewu, cìdì bwâtù bwàmba kacyèna nè cìdici cishintulula to. Vùlukàâyì nè, Yêyè ùdi mwà kwamba nè: "Ditalala, pùwaayi."

²¹⁵ Nudi nuciitabuuja nè mwoyi wènù wònsò anyì? Nwènù nwitabuuja nànkù, juukilaayi kuulu nùcítàbè. Juukilaayi kuulu nwámbe nè: "Ndi nciitabuuja nè mwoyi wànyì wònsò." Juukilaayi kuulu buludì. "Ndi mpindyewu ngiitabuuja." Ncyà bushùwà, nànsha lutàtù lwèbè lwikàlè lwà bishi, juukilà kuulu, ùMupè Butumbi.

²¹⁶ Taatù wa mu Dyulu, nyèwù tulwa Kùdì nè batèèleji aba. Mbatwìshìibwe nè Wêwè udi kaaba aka, Mukalenge.

Swàkù bwà démon yònsò, bupidyà, kabìbàkwàci kàbìdì to, Yesù Kilistò ànwòndopèku bònsò bwènù.

²¹⁷ Sàtaanà, pàtukà mu batèèleji aba! Mu Dîna dyà Yesù Kilistò, udi mubèngiibwe. 

64-0319 Kusòka Yesù Mu Cyalu
Denham Springs High School
Denham Springs, Louisiane États-Unis

CILUBA

©2026 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwê anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyî wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org